

# BIFWANI YA KLISTO



Ya kele lembami mingi samu na beno, na kutubaka yawu.

Mu kele na kyese mingi na kuvwanda na yinzo ya Mfumu. Ya kele kaka na kisika mosi ya kulutila mbote, mpe ya kele na Mfumu. Mutindu yina ve? Ntangu ya kele. . . Bampasi nyonso mpe bakumekama mpe minianga ya luzingu ke vukana na mbasi ya nene, ya nkembo. Mpe kieleka beto ke vingila ntangu yina ntangu beto ke mona Yandi.

<sup>2</sup> Mpe muntu mosi yufulaka munu, kilumbu yina, yandi tubaka, “Nge ke banza, Mpangi Branham, ti Nkwizulu ya Mfumu me kuma pene-pene?”

Mu tubaka, “Kieleka mu ke ndima yawu.”

Yandi tubaka, “Mbote, mu me kuwaka yawu kubanda ntama.”

<sup>3</sup> “Kasi,” mu tubaka, “kilumbu mosi nge ke kuwa yawu samu na mbala ya nsuka.” Beno me mona? Ya kele kieleka, samu ti Yandi—Yandi ke kwiza kilumbu mosi. Mpe ntangu nyonso yina ya ke vwanda, mu zola kaka kuvwanda ya kukubama. Mu. . . ya kele. . .

<sup>4</sup> Beto vwandaka tuba, kilumbu yankaka yina, na ntwala ya mwa bantu ya mumbongo, yina vwandaka banzonzi, mpe nionso yina. Mpe—mpe bawu tubaka. . . Mosi tubaka, “Yinki kele lukanu ya nge—ya nge ya ntete na luzingu?”

Mu tubaka, “Mu kele na mosi.”

Yandi tubaka, “Yinki yina?”

<sup>5</sup> Mu tubaka, “Kuvulusa mioyo samu na Klisto.” Yawu yina kaka mu. . .

<sup>6</sup> Dibanza ya munu ya zulu mingi, mpe kaka lukanu mosi, kele kumona Yesu Klisto kuzwa nkembo. Mu ke zinga samu na yawu.

<sup>7</sup> Mpe mu kele na kyese mingi, kimbangi ya beto, ti bamvula makumi tatu na mosi ya ke na kusalaka ntangu yayi, mu me sadila Yandi na kukikulumusa nionso. Kana mu lendaka zinga mafuku ya bamvula, ti mu vwandaka na luzingu mingi samu na kuzinga, mu ke zola kuzinga konso muniti ya yawu samu na Yandi. Samu ti mu. . . Mpe kana mu zabaka ti ba ke losa munu na nsuka, ya kele bweso ya kuzinga samu na Yandi! Yandi kele kieleka mpe mbote mingi!

<sup>8</sup> Mpe mu me monaka ntete ve kima mosi, na nzietelo ya munu nionso ya luzingu, yina mu lendaka fwanikisa na mbundana yina beto ke na yawu kintwadi ntangu beto kele beto mosi, Yandi mpe munu. Ya kele ve na mbundana ya kulutila lembami. Ya kele nene

mingi kulutila zola nyonso, samu na kento, bana, to kima mosi, kele zola ya Klisto. Ya kele mbote mingi.

<sup>9</sup> Ntangu yayi, beto kele na kyese mingi na kumona reveil yayi kulandila na kati ya sabala. Mpe mu kuwaka ti Mpangi Parnell, mpe bayankaka, vwandaka sala mwa nzonzolo mosi ya nene awa. Mpe beto ke tula kivuvu ti na reveil yayi. . .

<sup>10</sup> Ba ke bakulaka yimbi réveil bantangu yankaka. Muntu mosi ke banzaka ti reveil kele kukotisa bamambeke ya malu-malu na dibuundu. Ve. Bambuma ya reveil kele yina. Kasi reveil kele kuzingisa yina kele yimeni na kati ya dibuundu. Beno me mona? Ya kele samu—ya kele kunata yawu.

<sup>11</sup> Ya vwandaka na ntangu mosi mu telemaka pene-pene ya mubu, mpe mu—mu banza ti mu me tangaka yawu bambala mingi, kasi ya kele. . . ya vwandaka bamvula mingi, me luta. Mpe ya vwandaka mbala ya ntete mu monaka, dibulu, ya vwandaka ve mubu, ya vwandaka Dizanga ya Michigan. Hope mpe munu vwandaka kuna ntangu Lukutakanu ya Yinza vwandaka kuna. Yina vwandaka kuna, mu banza, pene ya mvula 1922, Mpangi Egan, ya kulutila mbote mu ke bambuka moyo, ntangu Lukutakanu ya Yinza vwandaka na—na Chicago. Ya vwandaka mbala ya munu ya ntete na kumona nzutu ya nene ya maza. Mpe mu telamaka kuna kilumbu yina, mpe mu monaka bitembo yango ya nene. Ya vwandaka kaka mutindu. . . Na suka ya Paki, ba vwandaka na lukutakanu ya kubasika ya mwini kuna. Mpe kumona bitembo yina ya nene kukota mpe kubasika, mpe, oh, mutindu yawu vwandaka na kyese mingi.

<sup>12</sup> Kasi mu bandaka na kubanza, “Beno zaba, ya kele dyaka ve na maza na dizanga yina, mpe ya landilaka mutindu yina, kulutila ya kele ntangu ya ke ninganaka ve. Ya kele kitezo mosi ya maza, ata ditonzi mosi ve ya kulutila.” Kasi mu banzaka, “Mbote, samu na yinki mipepe ke kulumuka mpe—mpe ke ningisa dizanga mutindu yina?” Ya ke basisa mvindu nyonso na dizanga. Beno me mona? Ya ke losaka bima nyonso na kumu. Ntangu. . .

<sup>13</sup> Mpe kuna mu banza, “Ya kele mutindu dizanga ke na kuzwaka réveil.” Beno me mona? Ya ke ningisa yawu, mpe ke dumuka na zulu ya yawu, mpe ke ningisa yawu, tii mvindu nyonso ke zimbana. Ya kele kaka mutindu réveil kele, ya ke kotisa beto kota na Mpeve ya Mfumu, mpe beto ke sepela, mpe ke sungika bayimbi, mpe ke belama, mpe kutambula ya pene-pene, kukipesa ya malu-malu, mpe mbiekolo, tii kuna bima nionso mpe bantembe nionso ya yinza ke losama kuna na kumu, beno me mona. Na manima ya kele kutambula ya mbote, ya kuvedila, kubanda ntangu yina, ntangu masuwa ya ntama ya luzingu ke banda na kuningisa yawu. Oh, beno fwana tala mingi ve, samu ti bima nyonso kele na ngaanda ya nzila. Ya kele mbote.

14 Mbote, na nkokila yayi, beto zola baka ntangu ya yinda ve, yayi kele Kilumbu ya ntete ya nkokila, mpe nkokila ya ntete ya sabala, samu na nkokila ya beto ya reveil. Mpe mu vwandaka na kyese mingi na kuzabisa ti reveil ke landila.

15 Mpe mu kele na bankundi mingi. Mu ke mona bampangi yankaka awa, mpe bampangi yina pesaka munu bandosi yina ba me lotaka, na basabala fioti me luta. Mpe Mfumu me sadisa munu na kuzwa lutendulu ya bima yango ntangu yayi. Mu zaba ve nani kele na kati ya beto, mpe banzenza yikwa, to yina yankaka. Kasi Mfumu Nzambi ke pesaka kaka lutendulu na bandosi. Yawu kele kieleka mpe ya kulunga.

16 Mpe Yandi kele Nzambi mosi yina vwandaka na bilumbu ya Joseph, ntangu—ntangu ntinu lotaka bandosi. Mpe yandi tendulaka samu na yandi, mpe ya vwandaka kieleka. Mpe bayankaka ya bandosi yina ke na kulandana bubu yayi. Bambuma ya yawu ke landila dyaka. Mpe, Daniel, na bilumbu ya Nebucadnetsar.

17 Mpe pasteur ya beto ya nkembo, ya fioti, ya kukikumumusa tubaka, na mwa ntangu fioti me luta, mbote, yandi—yandi zolaka kaka ve kulomba munu na kusadisa dyaka yandi sabala yayi. Yandi tubaka, “Mu zaba ti nge me lemba, Mpangi Branham. Kasi,” yandi tubaka, “mbote,” yandi tubaka, “beto ke vingila kaka mpe ke kukiyufula.” Ya kele mbote.

18 Na yina, mu fwana yambula lukutakanu na Sydney, na Australie, samu na yina ba zolaka ve kupesa munu visa na ntangu yayi, beno me mona, samu na kubika Etats-Unis na ntangu yayi. Mpe, na yina, mpe bima yankaka, na yina mu lenda kwenda kaka ve na ntangu yayi. Mu zaba ve ntangu mu ke lenda na kukwenda. Kasi ntama mingi ve mu ke lenda. Kasi na yina beto zolaka vtutula yawu mwa fyoti, mu ke kwenda na Chicago ntangu yayi, samu na lukutakanu na Chicago, yina ke na kwiza. Na yina, ba me samuna ti mu zolaka vwanda kuna, kasi mu zabaka ve. Ntangu yina mu zolaka vwanda kuna, mu zolaka vwanda na Bisanga ya Fiji, kisika ba tubaka ti ya ke vwanda na bantu mingi ke vukana, mpe, na kati ya bisanga. Kasi mu lendaka ve kuvwanda na lukutakanu na ntangu yayi, kuna, samu na bamuswa ya visa. Mpe, kasi, mu ke sala yawu, ntama mingi ve. Ba ke na kuvingila kaka.

19 Ntangu yayi mu ke vwanda na Chicago. Gene, nge zaba yinki bilumbu ya kele? Muntu mosi me zaba yina ba zabisaka na ntwala? Mu me zaba ve ntangu ya vwandaka. Mu me monaka yawu kaka na *Herald Ya Lukwikilu*. Mu banza ti ya ke na kubandaka na kilumbu ya 4 to 5 ya ngonda, to kima mutindu yina. To, ya kele yina ke landa, pene ya sabala mosi kubanda ntangu yayi, bilumbu kumi. Mpe na yina mu vwandaka na kizitu mingi, mpe mu ke na nsatu ya bisambu ya beno.

<sup>20</sup> Ntangu yayi, na nkokila yayi, mu me soola mwa Masonuku, kana beno zola kutanga na munu, kuna na Santu Jean kapu 13, kaka kitini mosi. Beno bayina kele na ba-Biblia ya beno pene-pene, mpe ke zola kutanga na manima, na yina beto ke tanga.

<sup>21</sup> Mpe na mbala mosi na manima ya lukutakanu yayi, na nkokila yayi, ya ke vwanda na repetition ya makwela awa. Na yawu, kaka na ntangu beto ke manisa, kana beto ke kwenda nswalu nyonso, mutindu beto lendaka. Beno sala nswalu ve; kasi kaka na ntangu kivinga ke bikana ya mpamba, na yina bawu zola kusala repetition ya makwela. Mpe ya ke vwanda na makwela awa, mbasi na nkokila. Zole ya bana ya beto na tabernacle yayi na mbundana ke kwelana mbasi na nkokila, mutindu beno nionso me zaba. Mpangi ya beto ya luzolo, David Wood ke na kukwelana, ke kwela Marilyn Jefferies, mbasi na nkokila, na tabernacle, kaka na ntuala ya balukutakanu. Mpe na yina ba fwana sala repetition ya makwela yayi. Kaka . . . Ya ke vwanda ve lele ya makwela; lele ya mbanza ke lunga samu na makwela ya mbasi na nkokila.

Ntangu yayi, ntete beto tanga Ndinga ya Yandi, beto sambila.

<sup>22</sup> Tata Nzambi, na yina beto ke kwisa na luzitu nionso na Mvwandulu ya Nge, na kunataka na ntuala ya beto Nkumbu yina me lunga na nionso ya Yesu, beto me ndima ti Nge ke kuwa beto. Samu ti, Yandi tubaka, “Beno lomba na Tata kima mosi na Nkumbu ya Munu, Mu ke sala yawu.” Na yina, beto ke kwisa, mutindu bakwikidi ya Baklisto, na kikesa nionso na Kiti ya kimfumu ya lemvo, na kuzabaka yayi, ti, kana bantima ya beto ke na kufunda beto ve, na yina beto zaba ti beto me kuzwa bweso na nzila ya Nzambi.

<sup>23</sup> Mpe beto ke sambila ti baluzingu ya beto kuvwanda yina ke sepelisa Nge mingi, na nzila ya funguna ya beto ya bayimbi ya beto, mpe ludedomo ya Yandi na kulemvokila beto, ti bansatu ya beto ke lungisama na nkokila yayi. Mpe, Mfumu, nsatu ya beto ya kulutula nene kele kumona lemvo ya Nge ya nene me mwangana na zulu ya beto, mpe ya—ya kele, ti lemvo kila masumu ya beto mpe belusa bimbevo na kati ya beto. Mpe Nge lendaka zonga na beto na nzila ya luzayikisu, to profesu, to kaka kima yina Nge ke zola kutuba na Dibuundu ya Nge. Bika ti bantima ya beto kuvwanda na kiwidi ya mbote na ntuala ya Mpeve ya Nge. Bika ti beto vwanda ya kukangama mingi na ndonga ya nene na nkokila yayi, ti Mpeve-Santu lendaka zonga na bantima ya beto, mpe kuzwa nkembo na Mvwandulu ya Yandi.

<sup>24</sup> Ntangu yayi, Mfumu, beto ke sambila samu na bayina nionso kele ya kubela mpe kele na nsatu. Na yina, kaka na ntuala ya kukwisa, mutindu secrétaire ya beto nataka na bureau ya munu, na bilumbu zole ya nsuka, ba-liste ya yinda mingi ya bankumbu, bisika nyonso na yinsi, ya bantu yina kele na kubela, ke na kufwa, kele na mambu ya nswalu-nswalu ya kusonika na

mbwaki. Mpe mutindu mu ke tula musapi ya munu na zulu ya mosi na mosi ya bawu, tii na yisi ya page, O Nzambi, na ntwala ya dibuundu yayi, na nkokila yayi, Mu ke lomba lemvo ya Nge mpe kyadi, samu na mosi na mosi. Nge zaba mosi na mosi ya bawu, mpe yina bawu kele na yawu nsatu.

<sup>25</sup> Mpe beto ke zimbana yawu ve, Mfumu, yina kele na kukinzuka, na nkokila yayi, yina kele kuna na bayinzo ya bantu ya kukula mpe bikata. O Mfumu Nzambi, mingi ya bayina kele bana yina ba me sukula na Menga ya Nge. Oh, ntangu beto ke kuma kiboba, mpe bankundi ya beto ya luzolo me zimbana, ya kele na kubomba mosi yina kele na beto: Nzambi ke zimbana ata fioti ve. Bisalu ya beto nyonso kele ya kusonika na Buku ya Luzingu, mpe yawu kele ntangu nyonso na Mvwandulu ya Yandi. Mpe beto ke lomba samu na bawu, na nkokila yayi, Mfumu.

<sup>26</sup> Beto ke lomba kyadi samu na yinsi ya beto. Mpe samu na bayina ke na kusumukaka mpe ke sala yimbi, mpe samu na bayina kele na banganda mpe—mpe na bisika yankaka ya disumu, na nkokila yayi, beto ke lomba lemvo ya pardo, Mfumu. Mpe beto ke sambila ti Nge ke pesa beto ngolo, Mfumu, ti bantima ya beto ke vwanda ya kifuluka na zola ya Nge, ya ke wanda nsatu ya kulutila nene samu na kusadila Nge mpe kumona bayina me kuzwa mpulusu.

<sup>27</sup> Sakumuna lutangu ya Ndinga, mpe nyonso yina beto ke sala. Na kukikulumusa nyonso beto ke kulumusa bayintu ya beto mpe ke tonda Nge, samu beto me lomba yawu na Nkumbu ya Yesu. Amen.

<sup>28</sup> Ntangu yayi beno baka Buku ya Santu Jean, kapu 13, beto ke tanga kitini mosi.

*Ntangu yayi na ntwala ya feti ya paki, ntangu Yesu zabaka ti ngunga ya yandi kwizaka ti yandi zolaka katuka na yinza samu na kukwenda na Tata, ti yandi zolaka bantu ya yandi yina vwandaka na yinza, yandi zolaka bawu tii na nsuka.*

*Mpe madia ya nkokila sukaka, diabulu ntangu yayi yandi me tula na kati ya ntima ya Judas Iscariot, mwana ya Simon, samu na kuyekula yandi;*

*Yesu na kuzabaka ti Tata pesaka bima nyonso na maboko ya yandi, mpe ti yandi katukaka na Nzambi, mpe kwendaka na Nzambi;*

*Yandi telamaka na madia ya nkokila, yandi tululaka bilele ya yandi; mpe yandi bakaka lisume, yina yandi kangaka na luketo ya yandi.*

*Na manima ya yina yandi tsyamunaka maza na kati ya basini, mpe bandaka na kusukula makulu ya bilandi, mpe kukusuna bawu na lisume yina yandi kangaka na luketo ya yandi.*

*Na yina yandi kwisaka na Simon Pierre: mpe Pierre tubaka na yandi, Mfumu, nge ke sukula makulu ya munu?*

*Yesu vutulaka mpe tubaka na yandi, Yina mu ke sala ntangu yayi nge ke zaba yawu ve. . . kasi nge ke zaba yawu na manima.*

<sup>29</sup> Bika ti Mfumu kubwela balusakumunu ya Yandi na ntangulu ya Yandi, ya Ndinga. Mu zola baka dilongi mosi, na nkokila yayi, kaka samu na ntangu ya nkufi, dilongi ya: *Bifwani Ya Klisto*. Mpe mu zola, samu na dilongi, “Yinki yayi ke vwanda? Yinki ya ke lombana na kusala Muklisto?”

<sup>30</sup> Ntangu yayi, mu zaba ti yayi kele, nyonso, masonuku ya kumwangisa nsangu ve, ata fyoti ve. Mpe, kasi, ya kele dilongi ya kumwangisa nsangu, samu ti Dibuundu lenda kwenda ve na ntuala tii Yawu ke zaba wapi kisika Yawu ke na kukwendaka na ntuala.

<sup>31</sup> Mpe mu ke kwikila ti na ntuala muntu nionso lendaka ntete kuningana to kuzwa lukwikilu ya kieleka, ya kele, ntete, bawu fwana zaba kisika bawu me telama, mpe mutindu ya kutelama na manima bawu ke telama. Mu ke kwikila ti ya kele mfunu. Samu ti, beno lenda kaka ve kukota na kima mosi, na lukwikilu, ntangu beno zaba ve kisika beno ke na kukotaka. Beno fwana zaba. Mpe kana lukwikilu ya beto kele ya kusungama, mpe na kisika ya mbote, ya ke pesa kiese ya ntangu nionso.

<sup>32</sup> Ya kele kaka mutindu ba tubaka na kento yina, mu banza, ntangu yandi me kwelana, ti yandi ke vibidila mingi—mingi na kuyamba bébé ya yandi ya ntete ya fioti, yina yandi zabaka na mpasi. . . lendaka vingila. Kasi yandi, kuingila ya yandi kele mutindu yina. Kasi, na manima ya yina, ya kele na boma, kana ya ke kwisa ve na nswalu nionso, ti yandi ke kuzwa ve bébé yayi. Na yina yina ke nata yandi ntama, ntangu nyonso.

<sup>33</sup> Ntangu yayi, ya kele na nkisi yina bawu ke salaka na bilumbu yayi, mpe ya me salaka na kati ya bansungi nyonso, kana kento yina mona to ke kwikila ti yandi ke buta ve bébé yayi. Kana yandi ke basika kaka mpe ke ndima bébé, na yina, kima ya ntete beno zaba, yandi ke kuzwa mosi ya yandi. Ntangu yayi, ya kele ya kulakisa kieleka, yivwa na bambala kumi. Samu ti mutindu yina ya kukiyufula, “Oh, mu banza ti mu ke kuzwa yawu ve.” Kasi yina ke lombaka mwa nsayi kuna, mpe ya kiese yayi kuna, mpe mu banza ya kele nzila ya Nzambi ya kunata yandi na kondisyo yayi. Na yina yandi ke kuzwa bébé ya yandi mosi, samu ti boma yina mpe kuingila ke bika yandi.

<sup>34</sup> Ya kele mutindu mosi ya kele samu na bantu yina zola kubeluka, bawu, kana bawu lenda vwanda kaka na mwa nzikisa mosi yina ke monikaka.

<sup>35</sup> Mutindu Elie, ntangu yandi tubaka. . . Guéhazi tubaka, “Mu ke mona dituti pene ya nene ya diboko ya muntu.”

36 Elie tubaka, “Mu ke kuwa makelele ya kifuluka ya mvula.” Yandi monaka nzikisa.

37 Ya kele samu na yina, bambala mingi, mu ke tubaka na bantu, “Landila, banda na kukumisa Mfumu.” Beno me mona? Samu, yina kele bébé yina me ndimama, samu ti ya kele na kati ya mayela ya bawu tii ya ke kota na moyo ya bawu, ti bawu me beluka, na yina lukwikilu ke sungika yawu.

38 Beno fwana zaba yina beno ke na kusalaka. Beno fwana tula kivuvu na yina beno ke na kusalaka.

39 Na yina, bambala mingi, beto ke kuwaka nzonzolo yayi, “Oh, yinki kele Muklisto?”

40 Bantu yankaka ke sukisaka yawu na kukota na kati ya dibuundu. Muntu mosi tubaka, “Mbote, Muklisto kele mambele ya dibuundu, muntu yina ke vukanaka na dibuundu.” Mu ke kwikila ti Baklisto nionso fwana sala yawu, kasi mu ke kwikila ve ti ya kele Buklisto. Beno me mona? Ya kele yina Muklisto ke salaka na manima yandi me kuma Muklisto. Kasi ya zola kutuba ve, ti, samu ti yandi ke salaka yawu, ti yandi kele Muklisto.

41 Na yina bayankaka ke tuba, “Ve. Ya ke kwenda na dibuundu mpe ke sadila nsamunu ya ba-credo, mpe kuvwanda ya kukwikama na bima yina dibuundu ke longaka.”

42 Mpe na yina ya kele na bayankaka yina ke tubaka, ti, “Mu banza kulwata mwa—mwa kima mosi na zulu ya bawu, kulunsi mosi to kima mosi, yina kele kidimbu ya Muklisto.”

43 Mbote, mpe na yina ya kele na bayankaka yina ke kwikilaka, ti, “Mu banza, mu banza, kana ba ke pelisa mwinda, to kusala mutindu mosi ya kibansa, ti ya kele Muklisto. Kana ba ke kotisa bawu na masa, to ba ke sala mwa munkayulu, to ba ke pesa mwa bima na dibuundu, to—to ke sadisa mfinangani, ke sumba mwa makala samu na mufwidi ya kento, to mwa basapatu samu na nsona.” Ya kele bisalu yina Muklisto zolaka sala, kasi yina ke sala dyaka bawu ve Muklisto.

44 Mpe na yina bayankaka ke tuba, ti, “Kana beno kele na kifwani ya Klisto na kati ya ditoma ya beno, to na zulu ya kibaka ya beno, ti yina kele kidimbu ya Muklisto.” Mbote, bima yayi kele mbote mingi, kasi mu ke kwikilaka ve ti kulwata kifwani mosi ke sala beno Muklisto.

45 Mu ke kwikila ti yina kele kifwani ya Klisto ke sala beno Muklisto. Ya kele ve yina beto ke salaka, na ngaanda. Ya kele yina salamaka, na kati, yina ke salaka beto yina beto kele. Na yina, na yina, kana Yandi kele kifwani ya beto, mpe beto kele na mutindu ya Yandi mpe binama ya Nzutu ya Yandi, beto fwana vwanda bifwani mutindu Yandi. Na yina baluzingu ya beto lendaka talisa kifwani ya Klisto, na kukota na dibuundu ya beto ve, to na nzila ya kunata kulunsi, to ba-emotion ya beto,

kasi ya zolaka vwanda na Mvwandulu ya moyo ya Nzambi ya moyo yina vwandaka lakisa na nzila ya luzingu ya beto.

<sup>46</sup> Ba me tuba na munu, na nzila ya bamfumu, ti . . . na ntwala bawu kuzwa bilumbu ya kuniengisa bisengo, samu na kukatula mvindu ya wolo, kukatula kisengo mpe pyrite. Pyrite kele pene-pene mingi, mutindu wolo ya kieleka, tii ba ke bokila yawu “wolo ya bulawu.” Kasi mutindu bawu basisaka yawu nyonso, ti bawu bulaka yawu na nzundu. Ba-Indien vwanda salaka yawu. Mpe bisadi bisengo ya ntama ya wolo vwandaka sadila yawu, vwanda bula yawu na nzundu, mpe ba vwandaka balula yawu mpe vwandaka balula yawu, mpe ba vwandaka bula yawu tii kuna mvindu nionso vwandaka katuka na yawu. Mpe mutindu kaka yina bawu zabaka ti ya vwandaka yimeni samu na wolo, ya vwandaka ntangu muntu yina vwandaka kubula lendaka mona kifwani ya yandi na kati ya yawu. Muntu yina vwandaka bula lendaka ntangu nionso kutala, tii kuna yandi lendaka kaka kukizenga, na nzila ya kotalana ya yandi mosi na kati ya wolo yina yandi vwandaka bula.

<sup>47</sup> Mpe ntangu Mpeve-Santu ya Nzambi ke banda na kubula beto, na nzundu ya Nsangu ya mbote, tii bima nionso ya yinza ke bula, mpe beto lenda talisa kifwani ya Mfumu Nzambi, na yina mu ke kwikila ti beto me kuma Baklisto. Samu ti, mpova *Muklisto* zola kutuba “mutindu Klisto, mpe kulakisa Yandi.”

<sup>48</sup> Ntangu yayi yina zolaka tuba ve ti beto fwana kubika mandefu ya yinda, mutindu ba-artiste ke yemaka Yandi. Mpe to yina zola kutuba ve ti beto ke bika bansuki ya yinda, mutindu ba-artiste ke yemaka Yandi, to kulwata robe mutindu Yandi lwataka, samu ti beto ke na kuzinga na kilumbu yankaka. Beto ke na mfunu ve ya kuvwanda mutindu yina, samu na kotalisa kifwani ya Yandi ya nzutu.

<sup>49</sup> Kasi beto fwana, na myoyo ya beto, samu kotalisa kifwani ya Mpeve ya Yandi mpe mutindu ya Yandi ya luzingu. Mu ke kwikilaka ve ti Buklisto kele kukota na mabuundu to ba-credo. Mu ke kwikila ti ya kele kifwani ya Yesu Klisto na kati ya muntu, samu ti beto kele binama ya Yandi, binama ya Nzutu ya Yandi, mpe beto ke vibidila kifwani ya Yandi, Masonuku ke tuba.

<sup>50</sup> Ntangu yayi, wapi mutindu ya kifwani Yandi vwandaka? Yandi kwizaka ve samu na kuvwanda muntu mosi ya nene; kasi, Yandi vwandaka. Kasi Yandi kwizaka mutindu kisadi. Kwizaka ve samu ba sadila Yandi, kasi samu na kusadila. Dilongi ya beto, na nkokila yayi, ke talisa yina Yandi vwandaka. Ya kele yina ke salaka Yandi nene, na dibanza ya munu. Kasi, na kuvwandaka Nzambi ya Seko, Nzambi ya kieleka Yina vangaka mazulu mpe ntoto; mpe ntangu Yandi kwizaka awa, Yandi bakaka kisika ya yisi mingi, kusalu ya kulutula nsoni yina muntu lendaka kuzwa, vwandaka muntu yina ke sukulaka makulu ya bantu.



<sup>51</sup> Na misendo nionso, ya bilumbu ya ntete, na yinza ya Esete, muntu yina ke sukulaka makulu vwandaka muntu yina vwandaka futama na yisi mingi na kati ya bantu nionso. Na yina, na bilumbu yina bibulu vwandaka tambula na babala-bala ya nene, ti, na mwa banzila yina bawu vwandaka kwenda. Mpe kuna na lweka ya nzila, ya vwandaka basisa nsunga ya yimbi, na kati ya nzila, kisika bibulu vwandaka. Mpe fundu-fundu pumbukaka mpe mataka na makulu ya bawu mpe na makulu ya bawu. Mpe nsunga ya yimbi, mutindu ya vwandaka! Mpe kaka na ntangu muntu mosi kwisaka kutala yankaka, yandi lendaka kwisa ve na mutindu yina. Yandi vwandaka na nsunga ya yimbi, samu na nsunga ya yimbi ya nzila, mpe putulu, mutindu na kidikilu ya bampunda.

<sup>52</sup> Na yina, kima ya ntete yandi salaka, yandi kuzwaka mwa cabine ya fioti, cabine ya reception, mpe muntu yina ba vwandaka futa na yisi mingi na kisika yango, kaka mutindu mpika mosi, vwandaka bikana kuna na kati, samu na kusukula makulu ya nzenza yina vwandaka kwisa, mpe vwandaka pesa yandi basapatu yankaka ya kulwata, mwa ba-sandale, samu na kulwatisa yandi. Mpe na yina ba pakulaka yandi, mpe, na yina, na mafuta. Mpe yandi lendaka kota kuna samu na kuvwanda nzenza ya nkundi ya yandi. Mpamba ve ti, yandi talanaka bisika nyonso, ke kota, ya kifuluka na nsunga ya banzila, mpe mutoki, mpe nyonso yankaka yina. Mpe muntu yina ke sukulaka makulu ba vwandaka kufuta yandi na yisi mingi kulutila muntu nionso vwandaka kuna.

<sup>53</sup> Mpe Nzambi ya Mazulu, kukikulumusaka Yandi mosi, samu na kuvwanda. . . Ya kulutila nene yina kumaka ya kulutila yisi yina vwandaka.

<sup>54</sup> Wapi luswaswanu, ya bayina ba ke bokilaka, yina ke talisa Buklisto bubu yayi! Wapi luswaswanu! Mbote, Muklisto yina ba me bokila bubu yayi ke zola kusadila. Oh, yandi ke banda na kubanza ti yandi kele muntu.

<sup>55</sup> Wapi luswaswanu, ya vwandaka, ntangu Yandi vwandaka talisa Yandi. Kwisaka ata fioti ve samu na kusadila Yandi. Kasi Yandi vwandaka. . . Yandi kwisaka samu na kulonga. “Ti yandi yina kele ya kulutila nene na kati ya beno kuvwanda kisadi ya bawu nyonso.”

<sup>56</sup> Mpe beto me mona, bubu yayi, ti mutindu ya beto ya Buklisto ya bilumbu yayi kele, “Mu kele muntu, mpe beno kele kima mosi ve.” Oh, ya kele. . . Ya kele luvunu. Ya zolaka vwanda ve mutindu yina. Beto ke na kumeka na kutalisa Buklisto na mutindu ya yimbi. Nzambi zola ve ti beto sala yawu mutindu yina. Yandi. . . Beto yimbaka nkunga, *Kuvwanda Mutindu Yesu*, kasi ntangu ya ke kuma ntangu ya kukulumusa lunangu ya beto, mpe kukikulumusaka mutindu Yandi salaka, na yina beto ke sala nzila.

<sup>57</sup> Mpe na kusalaka mutindu yina, muntu me sala ba-denomination, ti bawu lenda kabuka bawu mosi, “na kutala ti bawu me kuzwa ve Mpeve,” mutindu Masonuku ke tuba. Bawu ke kabuka bawu mosi. “Beto kele ya dibuundu *kingandi*. Ya kele—ya kele dibuundu ya kulutula nene. Ya kele dibuundu ya kulutula mbote. Denomination ya beto kele dénomination ya kulutula nene.” Yina ke sala ve mutindu Yesu. Yina ke talisa ve luzolo ya Yandi mpe bumuntu ya Yandi.

<sup>58</sup> Yandi kwisaka na bantu ya kulutula yisi mingi, na kento ya kindumba kuna na bala-bala, na mulombi, na muntu ya mpamba-mpamba, mpe kotaka na kati ya putulu na bawu. Ya kele luzingu ya Muklisto. Ya kele mutindu ya zolaka vwanda, samu na kotalisa Yandi na mutindu yina.

<sup>59</sup> Oh, mu zaba bantu ke tubaka, “Ya kele—ya kele bilumbu me lutaka.” Ya kele ve.

<sup>60</sup> Kana Klisto kele kaka Klisto, kana Mpeve ya Yandi kele dyaka Mpeve-Santu yina vwandaka na kati ya Yandi, kuvwanda na kati ya beno, Ya ke sala beno kubaka ntelamanu yina, mpe.

<sup>61</sup> Kasi, bubu yayi, beto ke meka na kubanza ti beto kele ya kuswaswana. Wapi mutindu ntama ya kele kisambu ya Yandi, ntangu Yandi sambilaka, ti, “Bantu nyonso ke zaba ti beto vwandaka bilandi ya Yandi, ntangu beto ke zolana mosi na yankaka.”

<sup>62</sup> Mpe na kisika ya yawu, beto ke swana mosi na yankaka. Beto ke vweza mosi na yankaka, samu ti beto ke wisanaka ve na mwa bima. Mpe beto ke basika mpe—mpe ke fundisana mosi na yankaka, beno me mona, kisika . . . mpe dyaka ke tuba ti beto kele Baklisto. Mu zaba bantu yina ke tubaka ti bawu kele ya kifuluka na Mpeve-Santu, kele ya kubwa na bima ya mutindu yina, ke basika mpe—mpe kieleka ke tuba bima ya yimbi na yina me tala Baklisto yankaka. Ntangu, bawu zolaka sala ve bima yina. Ntangu yayi, mpangi-bakala, mpangi-kento, ntangu beto kele na mpeve ya mutindu yina, beto fwana kutuba mutindu mosi ti beto kele ve Baklisto ntete. Ata mutindu beto ke tuba, ya kele yina beto kele na yawu yina kele na yawu. Beno me mona? Beto lenda vwanda ve Baklisto mpe kuzola bantu nionso ve. Beto lenda vwanda ya kuswaswana na bantu.

<sup>63</sup> Kasi, Yesu tulaka ve na kati mpe tubaka, “Mbote, ntangu yayi, awa, beno nionso ba-Pharisien, beno nionso ke kwenda na difelo. Mpe ya kele ve na siansi samu na beno, samu na *yayi, yina*, to *yankaka*, samu ti nge kele Pharisien.” Kasi Yandi kwendaka na bawu, mpe Yandi sadilaka bawu, mpe Yandi sadisaka bawu. Yandi salaka nyonso yina Yandi lendaka, samu na kusadisa bawu.

<sup>64</sup> Kasi, bubu yayi, malongi, mpe bamambeke ya dibuundu, mpe kuvukana ya yinza me nata dibuundu kintwadi na mutindu ti bantu ya mayele me baka kisika ya kimpeve.

65 Beno lenda ve kukuma na Nzambi kana ve na nzila ya Mpeve. Ya kele kaka na mutindu mosi yina muntu lenda kwiza na Nzambi, mpe ya kele na nzila ya Mpeve-Santu. Yesu tubaka, “Muntu ve lenda kwiza na Munu, kana ve ti Tata me benda yandi ve, ntete.” Ya kele kaka kieleka mutindu ya lendaka vwanda, Muklisto.

66 Beto zola baka mwa buku, na nkokila yayi, na kati ya ntima ya beto, mpe kutanga bima yayi ntangu yayi. Bika beto banza yayi.

67 Oh, bayankaka na kati ya beto ke tubaka ti bawu kele na luzabu nionso. Beto kele na bayina ke tubaka, “Ntangu yayi beno vingila!” Ba ke zolaka kuvwanda “badokotolo” mpe “batata ya santu,” mpe nyonso yina. Kasi na kuzabaka nyonso yayi, kana beno vwandaka na luzabu nyonso, ya ke sala beno mbote ve kana ve beno (vwandaka) beno vwandaka na Mpeve na kati ya beno, ya zola. Biblia ke tuba, “Ata ti mu kele na luzabu nyonso, mpe mu kele na zola ve, mu kele kima mosi ve.”

68 Mpe wapi mbote luzabu ya beto ke sala, ntangu muntu mosi ke tuba, “Mu ke kwenda ve na reveil mutindu yina, samu ti bantu yina me longukaka ve. Mu—mu ke vukana ve na bawu”?

69 Ya lenda vwanda ti bawu zaba ve ABC ya bawu, to ve, bawu lenda zaba Klisto. Kieleka ata fioti ve beto lenda kulumuka na yisi mingi. Bika ti Nzambi ntangu nyonso kubumba Mpeve yayi na kati ya munu. Ya lenda vwanda yinki mutindu—yinki mutindu ya yisi, yina yandi ke kwikilaka, yina yandi ke kwikilaka ve, yinki credo, ntinta, to yina, mu zola kutanda diboko mpe kusadisa yandi. Kieleka. Mu zola Mpeve yina na kati ya munu. Mu ke banza ve ti mu kele mbote mingi kulutila muntu yankaka; mu lendaka vimbisa ntulu ya munu, mpe kutuba, “Bantu nionso ke telema ntangu mu ke kota,” to, “Mu ke na campagne ya nene mingi kulutila bawu nionso.” Nani mu kele, na mutindu nyonso, kasi ntoto yina Nzambi salaka? Ti mu kukikumusa munu mosi, ti luzingu ya Yandi ke talisama. Bika beto, Baklisto nionso, ke tala mutindu yina. Luzabu ke nata beto kisika mosi ve.

70 Mumbandu, yinki mutindu kana kuna ya kele na kaze mosi ya kufuluka na ba-canarie mpe kaze kele yinda ya tabernacle yayi? Mpe mwa canarie mosi ke pumbuka na kati ya kaze, mpe yandi tubaka, “Batata, mu zola tuba na nge kima mosi. Ya ke salama ti mu kele fioti na zulu kulutila beno nionso. Beno me mona, mu kele—mu kele lukanu yina zaba bantu nionso. Oh, mu lenda tendula yawu nionso. Mu me monaka mama yango kutambula na yinzo. Mu me monaka bana kubula. Mu zaba nionso samu na yawu. Ntangu yayi beno nionso kuwa munu.”

71 Mpe kaka na ntangu yina yandi ke na kutimuna mwa yintu ya yandi, longoki mosi ya Université ya Princeton kwisaka kuna, na grammairre ya kulengula mingi. Mpe yandi bandaka

na kusolula na mwa canari yina, na kusadilaka grammaire ya kulutula zulu yina yandi lendaka sala, mpe mu vwandaka tuba na mwa canari yayi. Mu ke banza ti mwa muntu yango yayi lendaka balula yintu ya yandi na lweka yankaka. Yandi ke kuwa na lweka mosi na yankaka, kasi yandi zaba ve kima yina yandi ke na kuzonzila. Kasi, yandi lenda kuwa yandi. Kasi, yandi lenda mona yandi. Kasi yinki ke salaka luzabu ya yandi? Kima mosi ve. Samu ti, yandi zaba ve yina muntu ke na kuzonzila. Samu na yinki? Yandi kele na butomfo ya yintu. Yandi kele ve na yintu ya muntu. Yandi ke bakulaka kaka mutindu ba-canarie ke bakula.

<sup>72</sup> Mpe ya ke vwanda yinki mutindu muntu kele. Mu ke kipe ve mutindu beno kele ya mayela. Beto kele dyaka na bayintu ya bacanari, samu ti beto kele kaka bantu. Ba ke zaba Nzambi na nzila ya Mpeve, mpe na nzila ya luzayikisu na nzila ya Mpeve-Santu. Ata mbala mosi ve ti beto ke lenda na kubakula Yandi na nzila ya mayela. Beno lenda tuba, mpe kukota mpe kuzwa balukutakanu ya mayela, mpe psychologie mutindu beno zola, mpe bantu ke zaba Nzambi ata fioti ve. Bawu lenda ve.

<sup>73</sup> Beno lenda tendula mpe kutuba bantu yina ke dila mpe ke balula ditama yankaka kele kaka mutindu ya ntama, kasi ya kele muntu yina ke talisa Klisto na luzingu ya yandi. Muntu yina kele ya kukikulumusya, muntu yina ke tambula na Nzambi, ke sala mutindu Yesu.

<sup>74</sup> Kasi, beno me mona, mwa ndeke yayi lendaka bakula ve, kasi yandi banzaka ti yandi lendaka sala yawu. Samu, yandi me sala mutindu yina ve. Mayele ya yandi ke fwanana ve na mayele ya longoki yayi ya kulutula mayele.

<sup>75</sup> Mpe to ve mayele ya beto ke fwanana ve na Nzambi. Wapi mutindu mwa mabanza ya beto ya fioti, yina kele na nsuka ke fwanana ve na mabanza yina kele na nsuka ve; to mabanza ya beto yina kele na nsuka lendaka ve kufwanana na mabanza ya Nzambi yina kele na nsuka ve? Dibanza yina kele na nsuka ve ya Nzambi kele ntama mingi na zulu ya bantu ya mayele tii ya ke vwanda ata fioti ve.

<sup>76</sup> Mutindu kaka ndeke yina ke zaba yina muntu ke na kutuba, yandi ke kukipesa yandi mosi mpe ke ndima yawu, mpe ke sala nyonso yina yandi ke banza ti muntu zola ti yandi sala.

<sup>77</sup> Ya kele kaka mutindu yina beto zaba Nzambi, ya kele kulanda lutwadusu ya Mpeve-Santu. Yina kele mutindu ya ntama. Ya kele manaka ya Nzambi. Ya ke vwanaka ntangu nyonso manaka ya Nzambi. Ya ke vwanda ntangu nyonso manaka ya Nzambi. “Ve na nzila ya ngolo, ve na nzila ya ngolo, kasi na nzila ya Mpeve ya Munu, me tuba Mfumu.” Ya kele kisika ya ke kwizaka.

<sup>78</sup> Longfellow tubaka mbala mosi mutindu yayi, “Mutindu ya kununga kele kuzwa diambu ya kulunga yina ba ke na kuzonzilaka, dyambu ya kulunga yina ba zonzaka, mpe na

manima kukangama na yawu.” Kieleka. Kima yina ba zonzaka, ba me manga na—na nzila ya science, mpe, kana ya kele ya kulunga, na yina beno kangama na yawu.

<sup>79</sup> Beno zaba, na mvula 1872, Kimvuka ya Minganga ya Etats-Unis mangaka bidikilu? Bawu tubaka, “Yawu kele ve na bunkete.” Mpe tubaka, “Ya ke yalumuna bimbevo.” Bidikilu; nsuka-nsuka ba me kuma na yawu.

<sup>80</sup> Mpe Nsangu ya mbote ya ntama yayi yina beto ke na kuzonzila, ya kusukula na Menga ya Mwana-dimeme! Ya lendaka monana mutindu ya ntama, kasi ba fwana kwiza na Yawu, ntama mingi ve to manima. Ya kele dyambu ya kulunga. Kangama na Yawu, na nyonso yina kele na beno. Ya kele mutindu ya kusukula ya Menga yina ke sukula muntu; ya ke basika ve awa, ke kunwa malafu mpe ke kunwa makaya, mpe ke vukana mpe ke bokila bawu mosi “Muklisto” samu ti bawu kele kinama ya dibuundu. Ya kele Mpeve-Santu yina ya kukondwa mvindu, ya kukondwa mvindu na luzingu ya muntu, yina ke talisa Yesu Klisto Mwana ya Nzambi.

<sup>81</sup> Ya kele samu na yina bantu bubu yayi ke manga Mbutukulu ya malu-malu. Oh, bawu kele na yina bawu ke bokilaka Mbutukulu ya malu-malu, mutindu ya kupesa mbote na pasteur, kasi yina kele ve Mbutukulu. Ya kele samu na yina bawu. . . Bawu ke ndima Yawu ve. Ya kele samu na yina bawu ke kwendaka kota na mabuundu, samu ti bawu lenda kota na mutindu mosi ya mayela.

<sup>82</sup> Nzambi tubaka, “Kana ve ti muntu kubutama dyaka, yandi lenda kwandi ve kumona Kimfumu ya Nzambi.” Ya lenda vwanda mutindu mayela beno lendaka vwanda, to mutindu mbote Muklisto beno ke tubaka ti beno kele, beno fwana butama dyaka.

<sup>83</sup> Beno ke tuba, “Na yina, Mpangi Branham, mu fwana kwisa na mwa kumwangisa nsangu?” Yina zola kutuba yawu ve. Ya zola kutuba ti beno fwana kuzwa Mbutukulu ya malu-malu. Beno fwana butama dyaka.

<sup>84</sup> Yayi kele nkonga ya bantu, kasi mu ke tuba kima mosi. Yinki kele mbutukulu? Kana ti mbutukulu me salama na zulu ya nianga, to kana ya me salama na zulu ya ntoto, to na kati ya lupitalu yina bivinga kele na ntinta ya soie ya rose, ya kele mvindu, konso mutindu yina beno ke baka yawu. Ya kele kieleka.

<sup>85</sup> Mpe mutindu mosi kele Mbutukulu ya malu-malu. Ya kele mvindu, mutindu nyonso beno ke baka Yawu, kasi Yawu ke basisaka Luzingu. Amen. Ya ke basisaka Luzingu. Wapi mutindu ya Luzingu? Kisadi Luzingu, na kukikulumusana beno mosi, samu na kukimanga beno mosi. Ya kele mutindu ya Luzingu. Oh, bawu ke tuba, “Kasi mu me mona bawu kudila mpe ke boka pene-pene ya autel mpe ke landila mutindu yina.” Kieleka. Bawu me butuka. Ya kele mvindu, mu ke kipe ve kisika beno ke kwenda.

Beno lenda telama, kizizi ya beno nyonso ya kufuluka na maza ya meso, mpe meso ya beno mbwaki, mpe maboko ya beno me lemba smu na kubula na autel, kasi ya kele Mbutukulu. Ya ke sala kima mosi na beno. Ya ke sala beno kisadi. Ya ke katula beno ngolo. Ya ke sala kifwani, kusala Luzingu ya malu-malu, luvangulu ya malu-malu. Beno lendaka vwanda ya kuvwalangana, ntangu beno ke kuma ya muvimba, kasi beno me butuka mbala zole. Ata ti kisika beno kele, ya ke sala Luzingu ya malu-malu. Ya ke nata Luzingu ya malu-malu, kifwani ya Luzingu. Ya ke sala na beno kisadi. Beno zola kusadila, na ntangu yina. Yesu zola ti beto sadila mosi na yankaka, kuzola—kuzola mosi na yankaka. Mpe mutindu beto ke sadila mosi na yankaka, beto ke sadilaka Yandi.

<sup>86</sup> Ntangu yayi, beno bambuka moyo, ya kele kaka bambevo yina ke lombaka bukebi, kusalu. Kaka bambevo, ba ke lombaka bukebi. Mpe ntangu beno ke mona mulongi mosi. . . Mpe mu banza ti mu lendaka ve kaka kusukisa yawu na mulongi mosi, kasi bika ti mu sukisa yawu na konso mambele ya dibuundu yina zola bukebi, “Mu kele muntu mosi,” beno bambuka kaka moyo, ya kele na muntu ya kubela. Ba kele na nsatu ya bukebi. Ba ke na nsatu ya bukebi ya Mpeve ya Nzambi, samu na kupesa bawu kima yina ke basisa nkadulu yina na bawu, mpe belusa bawu na munimi ya bawu mpe mabanza ya bawu ya nene, mpe “munu ya nene mpe nge ya fioti.” Mpeve-Santu ke sala beto nionso mutindu mosi.

<sup>87</sup> Bimbevo mingi ya kimpeve, kumana ya menga! Beno zaba yina anemie kele? Ya kele muntu yina me kondwa menga. Ba ke tambulaka na mutindu ya ngitukulu. Bawu kele na zulu, na yisi mpe na zulu, ntangu nionso. Mpe yawu yina diambu na bambele ya dibuundu ya beto bubu yayi. Ba kele ba-anemique. Ba ke na nsatu ya kuvutula Menga, ya Calvaire, yina ke pesa bawu menga ya kulutila mingi, Menga ya kimfumu, samu na kusala bawu kutambula na mutindu ya ntama, Mpeve-Santu me sala nzila ya Nzambi. Yina ke pesa bawu kima ya kuzingila, kupesa bawu kivuvu ti ya ke sala bawu kutambula na kifwani ya Mfumu ya bawu.

<sup>88</sup> Samu munu mosi, kana mu vwandaka na nsodolo ya kusala, mu zola ti ya vwanda mutindu Yandi vwandaka. Yandi kwisaka samu na kuvwanda muvungi, mpe Yandi vwandaka muvungi. Muvungi kele mosi yina ke kwenda na manima ya dimeme ya yandi.

<sup>89</sup> Foto ya lukumu, mu banza ve ti beto kele na yawu na kibaka ya beto awa, kasi mu me vwanda na kivinga ya munu mpe me tala yawu. Mu lenda kaka ve kutanguna nkumbu ya artiste na ntangu yayi. Kasi ntangu yandi zimbisaka mwa dimeme yina, ya ndombe, mpe yandi bikaka makumi yivwa na yivwa mpe yandi kwendaka sosa yawu, yinki yandi salaka? Yandi ke kwenda awa mpe kuna na bantoto ya kuyuma. Yandi ke kukizenga yandi mosi na bansende. Yandi ke nungaka bigonsa. Yandi ke kwendaka na

lweka mosi na yankaka na kati ya mpimpa. Tii kuna, na nsuka, na yisi kuna na lweka ya mongo, ke kangama na mwa mulaka, pene ya kuzimbisa luzingu ya yandi, yandi tandaka diboko mpe bakaka mwa mwana yango na mutindu ya yawu ya kubwa, na manima yandi vutulaka yawu na yandi mosi.

<sup>90</sup> Mpe artiste yankaka fikulaka foto ya yandi na kunataka yawu na yinzo. Ntangu yayi, ya ke talana mutindu ti mvungi ke kotisa kaka diboko ya yandi na yisi ya dimeme, mpe ke banda na kulonga yawu mutindu *yina*. Kasi beno me tala mutindu mpeve me simba artiste yina? Yandi tulaka yawu ve na yisi ya diboko ya yandi. Yandi tulaka yawu na zulu ya mapeka ya yandi. Ntangu yayi mu zola ti beno mona lukengolo ya mvungi yayi.

<sup>91</sup> Ntangu yayi, Yesu, ntangu Yandi basisaka bampeve ya yimbi, Yandi tubaka ti Yandi salaka yawu na musapi ya Nzambi. Ntangu yayi, kana diabulu ke kwamisa nge, kima mosi kaka ya ke lomba, ya Nzambi, yandi kele—yandi kele kaka—kaka kima ya mpamba tii Yandi ke baka kaka musapi ya Yandi mpe ke basisa yawu.

Kasi ntangu dimeme ke vutuka na yinzo . . .

<sup>92</sup> Wapi kisika kele kitini ya ngolo ya muntu? Na mapeka ya yandi. Beno tala mutindu muntu, ntangu nyonso, mapeka ya yandi kele ya kulutula nene? Wapi kisika yandi lenda nata kizitu ya yandi ya kulutula nene? Na zulu ya mapeka ya yandi. Wapi kisika yandi kele ya kulutula mbote? Ntangu kizitu kele na zulu ya mapeka ya yandi.

<sup>93</sup> Na yina yandi ke baka dimeme, ke tula yawu na zulu ya mapeka ya yandi, mpe na lutondo ke vutuka na yawu. Bangolo nyonso ya Nzambi, ya kuzinga na mwa kibulu yango, ya kuzimbana, na kuvutulaka yandi. Kasi diabulu, kukondwa mpasi, Yandi ke basisa yawu, na musapi ya Yandi. Yandi kele mvungi.

<sup>94</sup> Muvungi fwana basika na nzila, samu na kuzwa bayina me basika na nzila. Mpe pasteur ya mbote kele mvungi. Ya kieleka, mpova *pasteur* zola kutuba “mvungi.” Mpe bantangu yankaka, na kati ya dibuundu, mwa nsambulu mosi to mwa kimvuka mosi ke telema na dibuundu; kimvuka mosi ke kwenda na lweka mosi, mpe mosi yankaka ke kwenda na lweka yankaka. Muvungi ya kieleka, ya mbote ke kwenda na kimvuka yina, (Yinki kusala?) samu na kuvutula bawu. Muvungi ya kieleka, ya kieleka, yinki yandi ke sala? Yandi ke kwenda ntama, yandi mosi, (Yinki kusala?) kuvutula bayina me zimbana. Yinki yandi ke na kusalaka? Yandi ke na kulakisaka kifwani ya Muvungi ya mbote, na kumekaka na kununga moyo yina kuna. Na yina, bawu kwendaka ntama na kisika mosi kuna, mpangi-bakala, bawu ke na kusalaka mutindu ti ba ke soba yinza, na ntangu fioti. Pasteur yina ke kwenda kaka na ntwala, samu na kusungika bawu, samu

na kununga bawu mbala mosi dyaka na manima mutindu yayi. Yina kele muvungi ya mbote. Yandi ke talisa kifwani ya Yesu.

<sup>95</sup> Mpangi-bakala, mu zaba ti ba ke bokilaka yawu kinzambi-nzambi. Ba ke bokilaka yawu bufanatiki. Kasi kana mu vwandaka na nsodolo ya kusala, na nkokila yayi, nsodolo ya munu zolaka vwanda mutindu Yandi. Mu zola, kana kima mosi na luzingu ya munu, samu na kutalisa kifwani ya Mfumu Yesu, luzingu ya munu.

<sup>96</sup> Mu ke kwenda, na manima ya mbasi na nkokila, na manima ya makwela yayi, mu ke kwenda na ntoto ya kuyuma. Mu zola kubikana kuna, samu, kuna na kati ya moyo ya munu, mu ke kuwa ti mu ke na nsatu ya kutambula pene-pene na Nzambi, kulutilla yina mu kele. Mu zola tambula ve. Mu ke meka na kutambula mbote, na ntwala ya Yandi, kasi mu—mu zola kutambula pene-pene na Yandi. Na ntangu yina Branham Tabernacle ke na kuzwa reveil, mu zola kuzwa mosi, munu mosi. Mu zola kaka ve ti ya salama na kivinga yayi. Mu zola ti ya salama na kati ya munu. Mu zola kutambula pene-pene. Mu zola Mpeve-Santu mingi na kati ya munu, samu na kutalisa Klisto na kati ya munu. Mu zola kuvwanda mutindu Yandi. Mu zaba ti konso Muklisto ya kieleka—ya kieleka ke zola kuvwanda mutindu Yandi. Yina kele nsatu ya ntima ya munu, kuvwanda mutindu Yesu. Yandi. . . Na yina, mu zola ti Yandi vwanda ya munu. . . Mu zola ti Yandi vwanda. . . Yandi kele kifwanukusu ya yina mu zola kuvwanda.

<sup>97</sup> Mpe, beno tala, ya ke lombamba Mpeve-Santu na kusala yawu. Ya kele kaka kima yina lenda sala yawu. Mu ke kipe ve na baseminere mpe yina muntu mosi fwana tuba na munu. Mu ke kipe ve kupesa bize na kulunsi, to kulwata yawu na ntima ya beno, to kutuba bisambu na bantu ya kufwa. Mu ke kipe na kima mosi, yina kele, mingi ya Mpeve-Santu samu na kuyala William Branham. Mu ke kipe ve na kukuma mambele ya dibuundu ya kulutilla nene na yina mu kele. Mu kele mambele ya Dibuundu ya kieleka ya Nzambi ya moyo, Mwana ya ntete. Mu butukaka na kati ya Yawu. Mpe mu zola mingi ya Mpeve-Santu na luzingu ya munu, samu na kutalisa Klisto Yina mu zola. Mu ke kipe ve yina mpepo to kitezo mu fwana kwiza, samu na kuzwa yawu. Mu ke kipe ve kana mu fwana kwenda *awa* to kukwenda *kuna*, ba ke bokila munu “fanatiki, exalté,” nyonso yina ya lendaka vwanda. Mu zola mingi Luzingu ya Yandi kutalana. Mu ke kipe ve na mpepo yina mu fwana kwiza. Mu ke tala na Mpeve-Santu, na yina mu lenda vwanda ya kulutilla kisadi mutindu Yandi vwandaka. Yandi vwandaka Kisadi ya Mfumu. Yandi me kwisaka ata fioti ve samu ba sadila Yandi, to samu na kuvwanda na kisalu, Yandi kwisaka ata fioti ve ti samu ba vwanda na kisalu ya Yandi. Kasi, samu na kusadila, Yandi bakaka kisika ya kisadi.

<sup>98</sup> Mpe kana Ntinu ya Mazulu lendaka sala yawu, mpe beto kele bamembele ya Nzutu ya Yandi, bika beto nionso kuvwanda



mutindu mosi; kuvwanda ya kuswaswana ve, kasi kukikulumusa beto mosi na Mvwandulu ya Yandi. Ata yina yinza fwana kutuba, to bantu ya mayele, beno banza kima mosi ve samu na yawu. Kuzwa kaka Mpeve-Santu, mpe kuvwanda mutindu Yesu. Ya kukikulumusa, ya lembami, ya kukikulumusa, baka kisika ya Yandi, mpe Yandi ke baka ya nge na Lusambusu.

Beto kulumusa bayintu ya beto na mwa ntangu fioti.

<sup>99</sup> Mu lendaka mona, na nkokila yayi, kimvuka ya maboko na kati ya yinzo yayi, ya bamabele ya dibuundu yayi mpe mabuundu yankaka? Ntangu mu ke tuba, “dibuundu yayi,” mu zola kaka kutuba. . . Ya kele kaka na Dibuundu mosi, yina kele Dibuundu ya Kubutuka ya malu-malu, Dibuundu Mwana ya ntete, Dibuundu ya Yesu Klisto, yina me butuka ve na yinza, kasi yina me butuka na Mpeve ya Nzambi. Mu lendaka mona nkonga ya maboko kutelama, mpe kutuba, “Nzambi, sala munu mutindu Yesu. Yidika munu, O Mfumu. Sukula munu, O Nzambi”? Nzambi sakumuna bantima ya nge. “Sukula munu, mpe mu ke vwanda na mpembe kulutila mvula-mpembe.”

<sup>100</sup> “Mfumu, ya kele na mwa bifu mpe bakukondama na luzingu ya munu. Mu vwandaka, mu vwandaka kuwa Mpangi Parnell, mpe Mpangi—Mpangi Neville mpe balongi yankaka ya mbote, mpe Mpangi Collins mpe mingi ya bampangi yina ke longaka. Mu vwanda kuwa. Kasi, Mfumu, na nkokila yayi, mu me kuma kaka na dibanza yayi ya nsuka: Yinki ba ke tuba na munu? Yinki ba ke meka na kutuba na munu? Mu me mona ti ba ke meka na kunata munu na kuvwanda mutindu Yesu. Mpe ya kele ve na mutindu samu na munu na kusala yawu. Mu—mu kele yingo. Mu kele na matono, mpe, kana mu lekita yawu, mu ke kumisa yawu kaka mpembe. Yawu me kuma kaka pwelele mingi na yinza. Mfumu, bika ti mu kukizimbisa munu mosi. Mu ke kipe ve wapi mutindu ya mvindu mutindu ya ke talana, na yinza. Mu zola kubutuka mbala ya zole, ya Mpeve ya Nzambi. Mpe mu zola Nge, Mfumu, fulusa munu, na nkokila yayi, na Mpeve-Santu ya Nge. Sukula munu. Santisa munu. Baka Menga ya Yesu, santisa munu, sukula munu. Mpe fulusa munu, tii mu ke kukizimbisa munu mosi, mpe mu ke mona yawu, Mfumu, na Nge.”

<sup>101</sup> O Mfumu Nzambi, Mvangi ya mazulu mpe ntoto, Yina vumbulaka dyaka Mfumu Yesu na lufwa, nataka Yandi na nzila ya Mpeve ya nkindusulu ya Nzambi ya Kukonda nsuka, nataka nzutu yina Nge zingilaka, mpe me vumbula yawu na Kiti ya kimfumu ya Mazulu.

<sup>102</sup> Yandi kwizaka na yina ya yisi mingi ti ya vwandaka na ntoto, kento ya kindumba, mpe kumaka kisadi ya yisi mingi, kwendaka na mbanza ya yisi mingi, salaka na bantu ya yisi mingi, kuzwaka nkumbu ya yisi mingi, mpe kumaka muntu ya kulutila yimbi na bamputu. Ata mpe samu na yinza, “Bandeke kele na mazamba ya

bawu, mpe mibaku vwandaka na mabulu, kasi Mwana ya muntu vwandaka ve na kisika ya kutula yintu ya Yandi.”

<sup>103</sup> Mpe, kasi, Mpeve yina ya nkindusulu Yina zitisaka Kisadi yina ya kieleka yina salaka Yandi mosi kisadi, ti beto fwana kuzwa mbandu ya kulanda, Ya zangulaka Yandi na mabulu ya yinda ya difelo, lutisaka Yandi na nzila ya ntoni. Mpe basisaka nzutu yina, mpe tulaka yawu na Mazulu ya mazulu, tii ba ke zangula Yandi na zulu mingi tii kuna Yandi fwana tala na yisi samu na kumona mazulu. Mpe pesa Yandi Nkumbu na zulu ya konso nkumbu yina ba me bokila, na mazulu mpe ntoto.

<sup>104</sup> Mfumu, bika ti beto kuzwa Mpeve ya Yandi, na nkokila yayi. Bika ti yina kuvwanda nsatu ya konso ntima na kati awa. Nge me mona maboko yina me mata, Mfumu, samu na kutuba bacrede ve, to ve samu na kukota na mabuundu, to—to kuswana na zulu ya bima *yayi*, to *yina*, kasi kuvwanda ya kukikulumusa na kati ya bantima ya beto, samu na kufwanana na kifwani ya Nzambi. Bika yawu salama na nzila ya Mpeve-Santu, Mfumu. Bika ti Mpeve-Santu ya Nzambi kusala beto. Ve na nzila ya dibanza ya lukolo, ti, “Beto fwana vwanda, mpe beto ke sala mutindu yina,” kasi, yina kele bébé yina me kuzwa lukumu ya bana. Kasi, Mfumu, ti ya salama kieleka na nzila ya Mpeve-Santu, mpe Mbutukulu ya malu-malu yina ke sobaka beto, na nzila ya kusoba ya . . .ya mpeve ya beto, samu na kusala beto mutindu Yandi.

<sup>105</sup> Widikila kisambu ya munu, Mfumu. Ya kele ya kulemba. Mu zaba, Mfumu, ya kele ya kulemba. Mu ke sambila kaka ve samu na bayina me telemisa maboko ya bawu, kasi samu na maboko ya munu mosi yina me telama. Sala munu mutindu Yandi. Nzambi, ata ti nyonso yina Nge fwana sala na munu, wapi dikani mu fwana kwiza, kusala munu mutindu Yandi. Mu zola vwanda mutindu Yesu, na kati ya ntima ya munu. Pesa yawu, Mfumu. Mpe munu kaka ve, kasi sala nionso yayi awa, na nkokila yayi, mutindu yayi. Pesa yawu, Tata, samu beto me lomba yawu na Nkumbu ya Yesu. Amen.

<sup>106</sup> Bamambele ya dibuundu kele mbote mingi. Mu kele na dyambu ve na yawu to mosi ya bima yango. Kasi, mpangi-bakala, kuvwanda Muklisto, zola kutuba kuvwanda ya kusungama na kifwani ya Klisto. Beto zola kuvwanda bifwani ya moyo; ya kele ve kulwata kifwani mosi, kasi kuvwanda kifwani ya Mfumu Yesu.

<sup>107</sup> Ya kele na mwa nkunga yina mu zola ti beno sadisa munu na kuyimba na ntangu yayi. Mu zaba ve. Mu lenda yimba yawu ve, kasi mu ke kwikila ti beno nyonso lenda. Sadisa munu. *Kuvwanda Mutindu Yesu*. Bantu yikwa me kuwaka yawu? Mu zaba ti beto nyonso zola vwanda mutindu yina, na yawu beto yimba yawu na Yandi.

108 Mu zaba na ntima ya munu ti Mpeve-Santu ya nene kele awa. Beno lenda bumbama ve. David tubaka, “Mu ke tula mbeto ya munu na difelo, kasi Yandi ke vwanda kuna.” Mpe Yandi ke vwanda bisika nionso. Na yawu, Yandi kele kaka awa, na nkokila yayi. Yandi zaba konso muvuma, konso kisalu, nyonso yina beto ke salaka, konso kutala, konso dibanza. Yandi zaba nionso samu na yawu. Beno ke kwikila yawu ve?

Na yawu kuvwanda mutindu Yesu, kuvwanda mutindu Yesu,  
Na zulu ya ntoto mu zola kuvwanda mutindu Yandi;  
Na nzietelo nionso ya luzingu kubanda na ntoto tii na Nkembo  
Mu ke lomba kaka na kuvwanda mutindu Yandi.

109 Beno zola yawu ve? Beno kuwa yayi ntangu yayi:

Na kidikulu ya Bethlehem kwisaka Nzenza,  
Na zulu ya ntoto mu zola kuvwanda mutindu Yandi;  
Na nzietelo nionso ya luzingu kubanda na ntoto tii na Nkembo  
Mu ke lomba kaka na kuvwanda mutindu Yandi.

110 Beno zaba yina ke vutukila na mabanza ya munu malu-malu yayi? Mazono, mu lokotaka registre ya ntama ya dibuundu. Ya vwandaka . . . Mu me monaka yawu ve. Mbote, ya kieleka, ya kele mbala ya ntete mu me talaka yawu. Mu zolaka sadila yawu ntangu dibuundu bandaka ntete. Mpe ya vwandaka na nkumbu ntangu Mpangi Seward kuna, mpe ya vwandaka na Mpangi George DeArk, mpe Mpangi Weber, bankumbu nyonso yina kuna. Mu monaka, bakalasi ya fyoti ya lukolo ya Lumingu. Mu monaka dikabu ya beto ya muvimba, ya bakalasi tanu, vwandaka dollar mosi mpe makumi sambanu, samu na tabernacle yayi, na bankama ya kuvwanda awa; dollar mpe makumi sambanu ya bacent. Beno me mona? Na yina mu ke tala na schema bubu yayi. Mu banzaka, “Bantu yikwa me kwenda!” Mu monaka Mpangi Frank Broy kuna, mama. Yina kele bokilo ya munu ya bakala. Mu monaka bantu yayi nionso ya ntama, Mama Weber. Bantu yayi nionso ya ntama, bawu nionso mataka na zulu ya kikalu, bawu mataka na Étage. Bawu nionso kwendaka. Mu ke bambuka moyo ntangu beto vwandaka telama awa. Mpe mu banzaka, “Mfumu Nzambi, dibuundu ya beto lendaka vwanda mwa mbote mingi, mpe beto ke na kuvingila kivinga mosi, kasi, Mfumu, Nge zola beto ntangu yayi kulutula yina Nge salaka na ntangu yina?” Ve, mu ke kwikila ve ti Yandi ke sala yawu.

111 Ntangu beto vwandaka telama mpe vwandaka yimba, “Mu ke zola kaka kuvwanda mutindu Yandi, nzyetolo ya luzingu ya

muvimba.” Mu lenda mona mwa George ya kiboba na nkingu ya yandi ya kuzibuka mutindu *yayi*, mpe mutoki vwandaka basika na yandi, ke ningisa muswale ya yandi na kati-kati ya misapi ya yandi. Mu lenda mona bizizi yango ya ntama, ya ntama ya ntama kuna, ke dila, na maboko ya bawu na zulu.

<sup>112</sup> Milongi kotaka na kivinga mpe tubaka, “Hé, bakala! Wapi mutindu beno ke kuzwa bantu na ngwisani mosi mutindu yina?”

<sup>113</sup> Mu tubaka, “Mu ke na kima ya kusala na yawu ve. Ba salaka bawu mpe sobaka na kifwani ya Nzambi, kuna na zulu ya kiti ya ntama ya putulu, kisika mosi kuna, kisika wapi bawu monaka Klisto na kati ya ntima ya bawu.”

<sup>114</sup> Wapi nsunga ya mananasi yayi ya lembami, bisambu yayi, ntangu ya vwandaka mata, ntangu nionso, mpimpa ya muvimba. Beto ke kwisa ntangu yankaka, mpe beto ke kwenda na yinzo mosi na yankaka, mpe beto ke vutuka na yinzo na ntangu yina; beto ke sambila mpimpa ya muvimba. Beto ke mona dyaka ve bukieleka yango. Ya ke monana mutindu ti nyonso me kwenda. Yinki kele dyambu? Yinki kele dyambu? Beto vutuka na zola ya ntete yina beto kuzwaka.

Mpe kuvwanda kaka mutindu Yesu, kuvwanda  
mutindu Yesu,  
Na zulu ya ntoto mu zola kuvwanda mutindu  
Yandi;  
Na nzietelo nionso ya luzingu kubanda na  
ntoto tii na Nkembo  
Mu ke lomba kaka na kuvwanda mutindu  
Yandi.

<sup>115</sup> Beno zola kieleka? Beto yimba yawu na maboko ya beno na zulu.

Kaka kuvwanda mutindu Yesu, kuvwanda  
mutindu Yesu, (Kufwanana na kifwani ya  
Yandi!)  
Na zulu ya . . .

Beno zolana mosi na yankaka.

. . . kuvwanda mutindu . . .

Beto kele bamambele ya Nzutu ya Yandi. Beto fwana vwanda mutindu Yandi.

Na nzietelo nionso ya luzingu kubanda na  
ntoto tii na Nkembo  
Mu ke lomba kaka na kuvwanda mutindu  
Yandi.

<sup>116</sup> Beno zola kieleka kutuba yawu? Beno tuba, “Amen.” [Dibuundu me tuba, “Amen.”—Mu.] Ntangu yayi ya kele ve mpeve ya lembami? Mu ke zola mingi kuzwa Yawu kulutila kima nyonso mu zaba na yinza. Mu . . . Beno lenda baka yinza nyonso yankaka, mpe mambu ya yawu ya ngitukulu, mitindu nyonso

ya beno ya mayela, badokotolo ya beno nyonso, ba-rabbin, ba-bishop, batata ya santu. Pesa munu Yesu. Ya kele kieleka. Bikwa mu kuzwa Yandi, na mutindu ya ntama yina. Mu ke kuwa Yandi kuna na kati ya ntima ya munu, mpe mu ke tala mbote baluzingu ya munu, mpe mu ke mona bansatu ya munu kele kusadila Yandi, ya kukikulumusa, ya lembami mpe ya kulemba. Ya kele yina beto kele na yawu nsatu, bankundi. Ya kele ku- . . . Ya kele Yesu. Ya kele Yesu ya Biblia. Ve Yesu ya mayela, kasi Yesu ya moyo. Yandi kele awa, na nkokila yayi.

117 Bantu yikwa kele ya kubela mpe kele na nsatu? Beno telemisa maboko ya beno, beno kele na nsatu ya Klisto. Beno kele ya kubela mpe zola ti ba sambila beno? Beno telemisa maboko ya beno, na zulu, samu mu mona nani beno kele.

118 Mbote, bantu yikwa kele na nsatu na kati ya ntima ya bawu, samu na kusambila samu na muntu yankaka yina kele ya kubela? Beto tala maboko ya beno kumata. Mbote mingi. Ya kele na ndambu ya bawu.

Bantu yikwa ke kwikila ti Yesu kele kaka mutindu mosi?

119 Beto kele ve na bakalati ya bisambu. Mu kele ve . . . Ya kele ve na bakalati ya bisambu, ya kele kuna? Mu banza ve ti ba vwandaka pene-pene.

120 Nge ke kwikila ti Yesu Mvulusi ya beto lenda kwisa, na nkokila yayi, na beto? Mpe kana beto yimba, mpe mu zonzila na kulakisaka kifwani ya Yandi, yinki Yandi zolaka sala kana Yandi telamaka awa? Beno banza ti Yandi ke sala mutindu Yandi salaka na Jean 4, kisika Yandi monaka kento yina na dibulu ya maza, mpe tubaka na yandi, zaba yina vwandaka na ntima ya yandi, mpe tendulaka yawu na yandi, mpe tubaka na yandi? Mpe yandi zabaka ti Yandi vwandaka Mesiya. Beno ke kwikila yawu? Nge ke kwikila ti Yesu mosi yina—yina kele Nganga-Nzambi ya Ntete. . . [Kisika ya mpamba na bande—Mu.] . . . diboko ya Nzambi. Nge ke kwikila ti Yesu mosi yina, na nkokila yayi, yina ke tambula kilumbu mosi. . .

121 Mpe ya vwandaka ve na ndonga ya bisambu, kasi ya vwandaka na mwa kento yina vwandaka basika menga. Yandi pasulaka nzila na kati ya nkonga ya bantu tii yandi simbaka lele ya Yandi, yandi vutukaka mpe vwandaka. Mpe Yesu balukaka mpe tubaka, “Nani me simba Munu?” Nge ke kwikila ti Yesu kele kaka Yesu mosi bubu yayi? Mpe nsatu ya yandi, na kati ya ntima ya yandi! Beno me mona, yandi vwandaka na boma. Yandi vutukaka mpe vwandaka. Yandi vingilaka. Mpe Yesu tubaka, “Nani me simba Munu?”

122 Mpe . . . Pierre, ntumwa, sembaka Yandi, mpe tubaka, “Mfumu, na yina, muntu nyonso ke na kusimbaka Nge!”

123 Yandi tubaka, “Yinga. Kasi yayi vwandaka kusimba ya kuswaswana. Ngolo basikaka na Munu. Mu—mu kuwaka yawu.” Mpe Yandi talaka bisika nyonso, na kati ya kivinga, tii kuna

Yandi monaka mwa kento yina. Mpe Yandi tubaka na yandi ti yandi vwandaka basika menga mpe lukwikilu ya yandi vwandaka belusa yandi.

<sup>124</sup> Ya kele Yesu? Ke. . . Beto lenda kukikumumusa beto mosi, na nkokila yayi, mpe me kuma ya kusoba na mpeve ya beto ya malu-malu, na nzila ya Mpeve-Santu, ti beto lenda pesa bikoba ya beto, meso ya beto, mpe lukwikilu ya beno, mpe lukwikilu ya munu, ti Yandi ke kwisa na kati ya kivinga mpe ke kwisa na kati ya beno, mpe ke tambula na kati ya munu, samu na kulungisa Ndinga ya Yandi, ti Yandi kele Nganga-Nzambi ya Ntete ya funguna ya beto? Yandi kele ya kuvwanda na diboko ya kibakala ya Nzambi, samu na kusala bakulomba na zulu ya funguna ya beto. Yandi mpe kele Nganga-Nzambi ya Ntete yina lenda simbama mutindu mosi Yandi vwandaka ntangu Yandi vwandaka awa na zulu ya ntoto, na nzila ya bansatu ya bimbevo ya beto. Beno ke kwikila yawu? [“Amen.”] Yesu yina mosi.

<sup>125</sup> Bantu yikwa na kati awa kele na nsatu ya beno mosi to muntu yankaka, bayankaka na kati ya beno yina mu zaba ve, muntu yina beno zaba ti mu zaba yawu ve? Mu ke tuba yawu mutindu yina. Mu zaba kima mosi ve samu na beno to lombilu ya beno. Kasi beno ke kwikila ti Yesu kele awa samu na kukifwanikisa Yandi mosi, samu na kukitalisa Yandi mosi na beto, samu na kusala na kati ya beto mutindu mosi Yandi salaka ntangu Yandi vwandaka na kati ya Yesu Klisto. Beno ke kwikila yawu? Beno telemisa maboko ya beno, beno nionso yina me zaba ti mu me zaba beno ve ntangu yayi. Beno me mona? Mu zaba beno ve.

<sup>126</sup> Mbote, beto mona. Wapi kisika beto lenda sikama, mbala ya ntete? Ntangu yayi beno vwanda na buzitu. Kana Yandi ke sala yayi, beno ke kwikila Yandi, na ntima ya beno ya muvimba? Beno me mona? Mu ke tala kaka. . . Mu zolaka bokila beno awa mpe kalentika maboko na zulu ya beno. Mu ke kwikila ve ti mu ke sala yawu. Mu ke kwikila ti Yesu kele awa.

<sup>127</sup> Beto, ve samu—ve samu na kunata kifwani ya Yandi, kasi beno vwanda kifwani ya Yandi. Ya kele Yesu beto zola. Mutindu yina ve? Kuvwanda kifwani! Mbote mingi.

<sup>128</sup> Ntangu yayi, Mfumu Nzambi, tala nsamunu ya nene. Kasi ya kele Nge, Mfumu, Yina salaka nsilulu. Ntangu yayi beto fwana landila na kukwenda na ntuala. Ntangu yayi kima fwana salama, ata ti beto kele ve dénomination. Beto kele kaka mwa nkonga ya bantu ya fioti, ya kukikumumusa, ya bamputu ya kulutula, ti, mingi ya beto ke basisa mabuundu ya nene, ya kulunguka. Kana beto kwenda, beto lendaka ve kulwata mutindu bawu salaka. Mpe na yina, kima yankaka, kana beto lendaka telema, mpe Mpeve ke sakumuna mpe beto ke tuba, “Amen,” mutindu Masonuku me tuba, beto ke basika, na mbala mosi. Mpe mingi ba zolaka yamba bawu ve: bayankaka na kati

ya bawu, samu na ntinta ya bawu; bayankaka na kati ya bawu, samu na credo ya bawu; bayankaka ya bawu, samu ti bawu zola Nge kulutila mingi. Mpe bawu—bawu kele na Mpeve. Bawu kele ya kufwa na bima ya yinza, mpe me butama ya malu-malu. Kasi bawu kele na Luzingu ya malu-malu, Luzingu ya kisadi.

<sup>129</sup> Kasi beto me vukana awa, Mfumu, na yisi ya mwa muludi yayi yina Nge me pesa beto, yina beto ke sepela. Ntangu yayi, Mfumu, ti ya zabana ti Nge kele Klisto, mutindu mosi, mpe ti Muntu ya nene yayi yina beto ke na kuzonzila, Yandi kele awa ntangu yayi samu na kukitalisa mpe kusala kaka mutindu Yandi salaka ntangu Yandi vwandaka awa na zulu ya ntoto. Pesa yawu, Tata, ti bawu lenda mona mpe kukwikila. Samu ti mu me lomba yawu na Nkumbu ya Yesu. Amen.

<sup>130</sup> Beno ke kwikila yawu, yina beno ke lomba, beno me bakula? Yinki kele lukwikilu? Lukwikilu kele kieleka. Lukwikilu kele kima yina beno zaba mbote. Lukwikilu kele kima mosi ve beno ke banza. Lukwikilu kele yina beno zaba, beno me mona, kima yina ke kulumuka na kati ya moyo ya beno.

<sup>131</sup> Mu ke zola bayina zaba munu ve, mpe mu zaba beno ve, mpe beno kele kaka na lombilu to nsatu, beno zola dyaka kutelemisa maboko ya beno. Mu zola kaka kuzwa dibanza ya nene, muntu nyonso na kati awa yina mu zaba ve. Mbote mingi. Ya kele kaka bisika nyonso. Mu ke zolaka ve kuzonza na bantu yina mu zaba, samu ti bayankaka ke tuba, “Yandi zaba bawu.” Kasi ya kele na maboko mingi yina me telama, yina mu zaba ve. Ntangu yayi, kana Mfumu Yesu ke pesa yayi, beno ke kwikila yawu na ntima ya beno ya muvimba, mpe kundima bakubeluka ya nge mpe nyonso yina ya lendaka vwanda?

<sup>132</sup> Pardo, beto—beto baka yawu, na kati ya bantima ya beto, beto sambila, “Yesu katula ntembe nionso.” Na yina, Yesu lenda tula ntembe ve. Kana beto kele na kifwani ya Yandi, beto ke kwikila. Yandi kwikilaka Nzambi. Yandi kwisaka sala luzola ya Nzambi. Yandi kipeke ve yina muntu tubaka, to muntu yankaka tubaka. Yandi kwizaka sala kima mosi: samu na kuvwanda kisadi samu na Tata ya Yandi. Mpe Tata ya Yandi zingaka na kati ya Yandi. Beto kwizaka samu na kuvwanda kisadi ya Nzambi. Mpeve-Santu ke zingaka na kati ya beto. Beto zola kusadila Yandi.

<sup>133</sup> Mu ke sikimisa meso na zulu ya kento, kento mosi ya ndombe ya kuvwanda kaka na manima awa. Mu ke kwikila ti yandi telemisaka maboko ya yandi, ti mu zabaka yandi ve. Na yina ti—ti. . . Mbote, ya kele na zole ya bawu kuna. Mbote mingi. To mosi ya beno bamama zaba munu, to mu zaba beno? Kana ya kele kieleka, beno telemisa maboko ya beno, ti mu zaba beno ve. Beno telemisa maboko ya beno. Mbote mingi. Mbote mingi. Beto kele banzenza mosi na yankaka. Na kati ya Masonuku, ya

vwandaka na kuzonza . . . Ya kele samu na yina mu talaka, beno kele . . . Beno vwandaka bantu ya ndombe. Beno me mona?

<sup>134</sup> Ya vwandaka na kento mosi, kilumbu mosi, na kati ya Biblia, kapu 4 ya Santu Jean. Yesu kwizaka na dibulu ya maza, mpe ya vwandaka na kento mosi ya Samarie. Yandi vwandaka kento ya dikanda ya kuswaswana. Mpe Yesu tubaka na yandi, na mwa ntangu fioti, tii kuna Yandi monaka yina vwandaka mpasi ya yandi, mpe tubaka na yandi yina vwandaka mpasi ya yandi. Mpe ntangu Yandi tubaka mpasi ya yandi, yandi tubaka, “Tata, mu ke mona ti Nge kele Profete. Ntangu yayi, beto zaba, ntangu Mesiya ke kwiza, Yandi ke tuba na beto bima yayi.” Kasi bawu bakulaka ve nani Yandi vwandaka. “Kasi,” yandi tubaka na Yandi, “nani Nge kele?”

Mpe Yesu tubaka, “Mu kele Yandi, yina ke zonza na nge.”

<sup>135</sup> Yandi vutukaka kuna na mbanza, kisika yandi katukaka, mpe tubaka, “Kwisa, tala Muntu Yina me tuba na munu mambu yina mu salaka, me tuba na munu yina ke tambula mbote ve. Yina ke Mesiya ve?”

<sup>136</sup> Beno bakento me tangaka yawu? Kieleka. Santu Jean, kapu 4. Mbote, kana . . . Yesu kele mutindu mosi mazono, bubu yayi, mpe kukonda nsuka. Mpe beno kele ya kutelama bametele makumi zole na tatu na munu, to ya kuvwanda, mu zola tuba. Nge ke kwikila ti Yesu mosi yina, ke tuba na kati-kati ya beto, lunga monisa na munu yina nge zola, kubanda awa? Kana mu me tuba na beno Kieleka, Biblia yayi kele kieleka, Yandi lenda sala yawu, Yandi ve? Kana Yandi ke sala yawu, beno ke kwikila yawu?

<sup>137</sup> Kento yina na nsuka, vwandaka tala munu, mutindu *yayi*, yandi ke na kimbevo ya mukongo yina yandi zola beluka. Ya kele kaka kieleka. Kana ya kele kieleka, telemisa diboko ya nge, mama na nsuka. Yawu yina.

<sup>138</sup> Ntangu yayi yinki samu na nge, mama? Nge ke kwikila, mpe? Mu ke kwikila ti nge tubaka ti nge vwandaka nzenza samu na munu, diaka, yina landaka yandi. Nge ke na mpasi na yintu ya nge. Mpe nge ke na mpasi ya mpusu, diaka. Kana ya kieleka, telemisa diboko ya nge.

<sup>139</sup> Ntangu yayi, vutuka na yinzo. Beno zole lenda beluka. Lukwikilu ya beno me belusa beno.

<sup>140</sup> Nge ke kwikila ti Yesu kele awa, na nkokila yayi? Wapi mutindu samu na bayankaka ya beno, beno pema kivinga? Kisika yankaka, beno kwikila.

<sup>141</sup> Awa kele kento mosi ya kuvwanda awa, yina ke sambila. Yandi kele munwani-mvita. Mu zaba yandi, kasi mu lenda sadisa ve samu ti Nsemo yango kele na zulu ya yandi. Yina kele Mademoiselle Bruce. Ntangu yayi, Mademoiselle Bruce, mu zaba kima mosi ve na yina me tala yina ke tambula mbote ve na nge.



Nge belukaka, na cancer, kilumbu mosi. Kasi kaka kuna na kielo yina, mbala ya ntete mu tekaka . . . mu tubaka . . . mu monaka nge ya kutelama na kyelo yina, Mpeve-Santu tubaka na munu kima yina muntu ve zaba na ngaanda ya nge mpe dokotolo. Ya kieleka. Mutindu yina ve? Nge ke kwikila ti Yandi lenda tuba na munu yina ke tambula mbote ve ntangu yayi? Mu zaba nge, kasi mu—mu zaba ve yina kele mpasi ya nge. Mu ke na dibanza mosi ve. Samu, nge me beluka na cancer. Kasi mu lenda ve kusadisa Nsemo yina na zulu ya beno. Beno me mona? Ya ke bikana kaka kuna.

<sup>142</sup> Ntangu yayi, mu ke mona muntu yankaka kutelama. Ya kele ve samu na beno. Ya kele samu na muntu kele na cancer. Ya kele kaka kieleka. Mpe na yina mu ke mona kento mosi, to kima mosi. Yandi kele nsumuki, to kima mosi, yandi kele na kikalulu ya kunwa malafu, to kima mosi. Mpe nge ke na kunataka bamuswale zole na zulu ya nge, samu na munu na kutentika maboko ya munu, samu na luvukulu ya bawu—ya bawu. Ya kele MUTINDU ME TUBA MFUMU. Ya kele kaka kieleka. Ntangu yayi beno vwanda zuzi. Ya kele kieleka? Kana ya kele kieleka, beno telemisa diboko ya beno.

<sup>143</sup> Muntu mosi na manima *awa*, yina mu zaba ve, telemisa diboko ya nge, muntu yina mu zaba ve. Awa, ya kele . . . Yinki ya kele? Beno telemisa maboko ya beno dyaka, kaka kuna na nsongi. Ya kele na bakento yiya to tanu ya kuvwanda kuna. Nge ke kwikila ti mu kele kisadi ya Yandi? Beno ke kwikila ti yina beno ke mona me sala na nzila ya Mpeve ya Nzambi? Beno ke kwikila? Kana beno lenda kwikila.

<sup>144</sup> Kento yayi kele ya kuvwanda, yina ke na kutalaka munu, yina me lwata mwa yimpu, yina me lwata maneti, na bilunga ya mpembe na makutu. Yinga. Ya kele ve samu na beno mosi. Ya kele samu na muntu yankaka, mpe bawu kele na konditsyo ya mpasi. Ya kele hemorragie ya kati. Ba kele na lupitalu. Lupitalu yina kele New Albany. Ya kele kieleka. MUTINDU ME TUBA MPEVE-SANTU.

<sup>145</sup> Ntwenya ya kento, nge telemisaka diboko ya nge? Kento, lweka *yayi* yankaka, vwandaka tala munu mutindu yayi, nge ke kwikila munu? Nge ke na nsatu na ntima ya nge. Nge ke kwikila ti Nzambi lenda monisa yawu na munu? Mbote mingi. Beno ke sambila samu na muntu yankaka, mpe. Ya kele muntu kele na cataracte na zulu ya meso ya bawu. Bawu ke vwanda na boma ti bawu ke kufwa meso. Ya kele kieleka. Ntangu yayi, kana beno ke kwikila samu na yandi, kento ke kufwa meso ve kana beno ke kwikila yawu.

<sup>146</sup> Kento yango mbala mosi na manima, na nsuka kuna, na manima ya kento yina telemisaka diboko ya yandi. Nge kele na kimbevo ya kidi-kidi. Ya kele kieleka. Kidi-kidi ya nge kele na laka ya nge. Ya kele kieleka. Mutindu yina ve? Na yina beno

telemisa maboko ya beno kana bima yina kele mutindu yina. Beno bakento kuna, mu ke tuba. Mbote mingi.

<sup>147</sup> Yinki vwandaka kento yina vwandaka landa kuna? Nge telemisaka diboko ya nge, mpe, mpangi-kento, kuna? Beno telemisa diboko ya beno, kiboba yina. . . Mbote mingi. Beno kele na rhumatisme yina beno zola ti ba sambila samu na beno. Ya kele kieleka. Mutindu yina ve? Telemisa diboko ya nge. Nge ke kwikila?

<sup>148</sup> Muntu mosi—muntu mosi na manima ya dibuundu, beno kwikila, beno vwanda na lukwikilu.

<sup>149</sup> Mu ke mona kento mosi ke tala munu, ke tala kaka na kati-kati ya bakento zole awa. Yandi kele na musapi ya yandi na yinwa ya yandi. Yandi ke kutana na lipaso, samu na bansatu ya yandi. Ya kele ya muvimba kieleka. Kana ya kele kieleka, telemisa diboko ya nge, mama. Yandi yayi.

<sup>150</sup> Beno ke kwikila? Yinki ya kele? Ya kele Yesu Klisto, Mwana ya Nzambi. Nge ke kwikila na ntima ya nge ya muvimba?

Ntangu yayi, vingila fioti, mpangi-kento.

Kuvwanda mutindu Yesu, kuvwanda mutindu  
Yesu,  
Na zulu ya ntoto mu zola kuvwanda mutindu  
Yandi;  
Na nzietelo nionso ya luzingu kubanda na  
ntoto tii na Nkembo  
Mu ke lomba kaka na kuvwanda mutindu  
Yandi.

<sup>151</sup> Ntangu yayi beno ke mona kufwa ya dibuundu ya kilumbu yayi. Yinki zolaka salama na bilumbu ya Mfumu Yesu, na wapi ntangu kusalamaka? Kento yina, na kiese mingi, yandi losaka dibungu yina ya maza, mpe na kati ya mbanza yandi kwendaka. Yandi tubaka, “Mesiya kele awa!” Kasi, bubu yayi, yinga, beno kele ve na mvindu mingi, kuna na autel, samu na kuzwa Mbutukulu ya malu-malu. Ya kele na kima ke tambula mbote ve kisika mosi kuna. Yina ke fidisa Mpeve-Santu na kati ya kisika yayi awa, ya ke kotisa reveil, kifwani ya Yesu Klisto, kifwani ya Yandi awa, ke tambula na kati-kati ya bantu, samu na kusala yawu. Yinki kele diambu? Ya kele na kima ke kondwa. Beto kele na nsatu ya reveil.

<sup>152</sup> Bantu yikwa kele ya kubela? Beno telemisa maboko ya beno, yina kele ya kubela mpe kele na nsatu.

<sup>153</sup> Beno tentika maboko ya beno na zulu ya mosi na yankaka. Beto sambila. Kaka na nswalu ntangu yayi, beno tula maboko ya beno na zulu ya mosi na yankaka, beno kubama samu na kuzwa kubeluka ya beno. Kana nge ke kwikila na ntima ya nge ya muvimba, nge lenda beluka kaka na ntangu yayi.

154 Mu vwanda yituka. Beto vwanda zonzila na kento mosi, mbutukulu. Mu me kuzwaka ntete ve, na luzingu ya munu, kento mosi, mutindu mu me zaba, mu me tambulaka na estrade, mu ke zolaka bébé mosi. . . Yinki ke salama? Kana mu lendaka mona yandi, mpe kumona yawu kusalama, nsatu ya yandi ya kitoko samu na kima ya mbote, Mu ke tuba na yandi, “Mama, nge ke sosa bébé.”

Yandi, “Yinga, Mpangi Branham.”

155 Mu zaba na kento mosi, na bamvula makumi yiya na yivwa, kuzwaka mwa bébé ya fioti ntangu yayi. Luzingu ya yandi nionso, yandi zingaka na bakala yayi kubanda, mbote, kubanda bamvula kumi na sambanu. Yandi kele na bamvula makumi yiya na yivwa, mpe yandi kele na makumi tanu kima mosi. Kaka na ntangu yandi tubaka, “MUTINDU ME TUBA MFUMU. Ya kele kieleka, nge ke kuzwa bébé yayi.” Yandi vutukaka na yinzo mpe sumbaka bilele samu na bébé. Bamvula tatu na ntwala, yandi vwandaka na bamvula makumi tanu na zole, yandi butaka mwana-bakala yina yandi vwandaka zola kuzwa. Samu na yinki? Ntangu yandi kuwaka yawu kuzonza, yandi zabaka ti ya zolaka salama. Yinki ya salaka? Ya tulaka yandi na dibanza ya mbote. Kana bayayi. . . Mpeve-Santu kele mbote mingi na kukwiza mpe kuzonza bima yayi na bantu. Kana ya ke. . . Kana beno kota na dibanza ya mbote ntangu yayi, kubeluka ya nzutu me suka.

156 O Mfumu, Nge kele Nzambi, mpe Nge kele Nzambi ntangu nyonso. Mpe beto kele—beto kele na kyese mingi na kuzaba ti Nge silaka ti Nge ke kuzwa ndambu ntangu Nge ke kwiza na ntoto. Ata ti nyonso yina ke salama to ke kwiza, ya ke vwanda na bantu yina ke kubama. Beto zaba ti ya kele na mosi ya kumi yina muntu ke pesaka na Nzambi. Mpe ya kele na mosi ya kumi na kati-kati ya bantu. Mu banza, mu banza beto ke tuba, mosi ya kumi, ya kuyonzika nionso na kati ya bansungi, ke vwanda Musolami yina ba me bokila.

157 O Tata, beto ke sambila, mutindu beto ke na kusala awa, beto nionso kintwadi, na kususaka mbanza, na kumekaka na kukotisa misumuki, na kumekaka na kusala kima mosi samu na Kimfumu ya Nzambi. Beto ke kulumuka na mbanza, beto ke tala mbote kukondwa kukipe diambu. Beto ke mona yawu. Mpe mutindu Lot, na Sodome, yawu ke ningisa mioyo ya beto konso kilumbu, samu na kumona bakento kunwa makaya mpe—mpe ke na tubaka ti bawu kele Baklisto, mpe bawu ke na kunwaka malafu, mpe ke na kusalaka bafeti, mpe ke na kulwataka bilele ya nsoni. Mpe—mpe bantu ke lula. Mpe, oh, disumu ya Sodome! Bantima ya beto kele ya kudasuka na kati ya beto, Mfumu.

158 Oh, kukondwa ntembe ti lukwikilu me kuma na kitezo ya kulutila yisi mingi, ntangu bantu kele mutindu yina, ke kondwa Menga ya Yesu. Yina ke santisa mioyo ya bawu mpe ke tula bawu

na tiya samu na Nzambi, kasi ba ke ndima yawu ve. Mpe mwa ba-missionnaire na bansongi, ya kubula ba-tambourin mpe baidrum, kele na bansongi ya bawu, mpe bawu ke na kusekaka beto na kunataka basantu ya Nzambi ya moyo.

<sup>159</sup> Oh, mutindu beto ke tonda Nge, Tata, samu na mpepo mosi, kisika mosi, yina ke longa Nsangu ya mbote, yina ke tanda diboko samu na bantu. Pesa, Mfumu, kaka ntangu yayi mutindu beto ke sambila, mpe zaba ti Mpeve-Santu ya Nge ya nene mpe Bawanzio kele—kele na bisika ya bawu awa na dibuundu yayi.

Nzambi, lemvo kila konso disumu.

<sup>160</sup> Bantu kele ya kubela awa, na nkokila yayi. Ya kele na mingi ya bawu. Nge me kukitalisa Nge mosi na kuvwanda awa, Mfumu, na nzila ya bisadi ya Nge. Mingi na kati ya bawu yina vwandaka sosa na kusimba kima mosi mpe vwandaka bokila lusalusu mpe na kubendaka yawu. Mpe, Mfumu, Nge zaba ti—ti Nge kele Yandi Yina kaka lendaka pesa muswa na yayi kusalama. Beno kele Nzambi, mpe Nzambi kaka, mpe Beno ke sala yawu samu na lukanu ya kieleka yina Nge silaka ti Nge ke sala yawu. Mpe ya kele kidimbu ya nsuka samu na dibuundu, mutindu Nge tubaka. Ntangu ya nsuka kele awa.

<sup>161</sup> Na ntangu yina Nge yufulaka kyuvu yayi, “Mu ke mona lukwikilu ntangu Mu ke kwiza na ntoto?” Beno me yufulaka ata fioti ve, “Mu ke mona bamambele ya dibuundu? Mu ke mona ba-crede? Mu ke kuzwa kieleka?” Nge tubaka, “Mu ke mona lukwikilu ntangu Mu ke kwisa na ntoto?”

<sup>162</sup> Mfumu, bika ti bambevo yayi kubika lukwikilu ya bawu, kubasika na kidi-kidi, mpe bantembe, mpe boma ya bawu. Bika ti lukwikilu ya bawu kuzwa kimpwanza kaka ntangu yayi. Mpe kana bawu kupesa lukwikilu ya bawu kimpwanza, kimbevo fwana bika, diabulu ke bika yandi, mpe ba ke vwanda na kimpwanza na Ngolo ya Nzambi ya Ngolo nionso. Bika ti Mpeve-Santu kuyala konso ntima, kubotika konso moyo, mpe kubelusa konso nzutu yina kele na Mvwandulu ya Kinzambi. Pesa yawu, Mfumu.

<sup>163</sup> Samu ti yayi mu me lombwa, ti dyabulu kubika muntu nyonso yina bawu ke na kukwamisa na kati awa, na nkokila yayi. Na Nkumbu ya Yesu Klisto, Satana, katuka nge mosi na bantu yayi. Mutindu kisadi ya Nzambi, mu ke boka samu na mambote ya bawu, mu ke lombwa mawa samu na bawu. Amen.

<sup>164</sup> Bantu yikwa ke kwikila na ntima ya beno ya muvimba ntangu yayi, na nionso yina kele na kati ya beno, ti Yesu Klisto ke kukitalisa Yandi mosi na zulu ya ntoto bubu yayi na kati ya bantu ya Yandi? Beno zola Yandi?

<sup>165</sup> Na yina beto yimba nkunga yayi ya ntama kintwadi, *Mu Zola Yandi*. “Mu zola Yandi samu ti Yandi zolaka munu ntete.” Beto nionso kintwadi, na ntangu beto ke telema ntangu yayi. Bantu nionso ntangu yayi, beto nionso kintwadi. Bantu yikwa

zaba yawu? Beno telemisa maboko ya beno. *Mu Zola Yandi*. Beto sambila Yandi ntangu yayi.

166 Bambevo nionso, bantu nionso ya mpasi, beno telega ntangu yayi, beno baka kubeluka ya beno. Mu ke kwikila, mpe na ntima ya munu ya muvimba. Kana beno ke bika kaka lukwikilu ya beno kukwenda, na ntangu yayi! Klisto ya Nzambi, Nani kele awa, kele. . . Yinki Yandi ke na kusalaka? Ke sala beto kifwani ya Yandi. Beno me mona? Mpeve ya Yandi awa, ke kukitalisa Yandi mosi na beno.

167 Ntangu yayi, beno zaba ti ya kele munu ve. Mu zaba ve bantu yina, ata nani bawu vwandaka, bayina me telemisa maboko ya bawu. Bawu me telemisa maboko ya bawu, ti bawu zabaka munu ve. Mpe mu telemisaka maboko ya munu, mu zabaka bawu ve. Kasi Nzambi zaba bawu. Yinki ya kele?

168 Ya kele Klisto ke kukitalisa Yandi mosi. Ya kele lukwikilu ya beno na kukwikila yawu. Ya kele lukwikilu ya munu na ministele, ti Yandi siamisaka yawu na munu na nzila ya Wanzio; Beno ke na kumona foto ya yawu, yina kele ya kukangama na kati ya kivinga ya arts ya misambidi, mpe Yawu kele bisika nionso na yinza, Yawu me zabana, Dikunzi ya Tiya yina twadisaka bana ya Israël.

169 Ntangu Yawu kumaka nsuni, Yawu vwandaka na mutindu ya kubokila Mwana ya Nzambi. Yandi tubaka, “Mu me katuka na Nzambi mpe me kwenda na Nzambi, vutuka na Nzambi.”

170 Na manima ya lufwa ya Yandi, luzikulu mpe mvumbukulu, Paul kutanaka na Yandi, na nzila ya Damas, na mutindu ya Dikunzi ya Tiya, na kati ya Nsemo yina basisaka meso ya yandi. Paul tubaka, “Nani Nge kele, Mfumu?”

171 Yandi tubaka, “Mu kele Yesu. Ya kele mpasi samu na nge na kutelemina bansende.”

172 Yesu tubaka, “Na mwa ntangu fioti, mpe yinza,” kosmos, ntumunu ya yinza, bamambele ya dibuundu, mpe nionso yina, “ke mona Munu diaka ve, kasi beno ke mona Munu. Samu ti Munu,” kiyingilu ya muntu, “Munu, Yesu mosi, ke vwanda na beno, mpe na kati ya beno, tii nsuka ya yinza. Mpe bisalu yina Mu ke sala beno mpe ke sala yawu. Kulutila yayi beno ke sala, samu Mu ke kwenda na Tata ya Munu.” Amen. Oh, la la!

Mu zola Yandi, mu zola Yandi  
Samu Yandi zolaka munu ntete  
Mpe futaka mpulusu ya munu  
Na yinti ya Calvaire.

173 Oh, na yina beto ke yimba dyaka yawu, mu zola ba-Méthodiste, mpe ba-Baptiste, mpe ba-Pentecotiste, mpe ba-Nazaréen, mpe ba-Pèlerin de la Sainteté, dibuundu ya Nzambi, beno nyonso, beno nyonso kintwadi, Mu zola beno kupesa mbote na muntu mosi na ntwala ya beno, mpe na manima ya beno, mpe

Iweka ya beno, na yina beto ke na kusalaka yawu ntangu yayi.  
Beto nyonso kintwadi.

mu... (Nzambi sakumuna nge, mpangi-  
bakala, pasteur.) ...zola Yandi  
Samu Yandi zolaka munu ntete  
Mpe futaka mpulusu ya munu  
Na Calvaire...

<sup>174</sup> Ntangu yayi yayi kele ntumunu ya mvumbukulu, “Beto yina ke vwanda ya moyo mpe ke bikana ke kanga bawu ve yina kele ya kufwa, samu mpungi ya Nzambi ke wakana mpe bantu ya kufwa kati na Klisto ke vumbuka ntete. Beto yina ke vwanda ya moyo mpe ke bikala ke zanguka kintwadi na bawu, beto ke kutana mosi na yankaka na ntwala beto kutana na Yandi. Beto kutana mosi na yankaka ntete beto kutana na Yandi, beto vukana kintwadi na Yandi, na bawu, samu na kukutana na Mfumu na mipepe, beto nionso kintwadi.”

<sup>175</sup> Ntangu yayi beto me kutana na mosi na yankaka, beto me pesana mbote mosi na yankaka, ntangu yayi beto pesa Yandi mbote.

Mu zola Yandi, mu zola Yandi  
Samu Yandi zolaka munu ntete  
Mpe futaka mpulusu ya munu  
Na Calvaire...

Malembe mingi.

<sup>176</sup> Kento mosi ya ntwenya basikaka mbala mosi na ndonga, kwisaka kuna mpe fukamaka na autel, vwandaka kudila mpe vwandaka kuboka. Ya ke vwanda na bayankaka awa yina ke kuwa kundima mosi yango, yina ke zola kufukama na yandi? Beto ke vwanda na kiese samu na nge kwisa mpe baka kisika mosi. Nzambi sakumuna nge, mpangi-bakala. Muntu yankaka lendaka kwisa? Ya kele mbote.

mu...

Yidika munu, Mfumu, mpe sala munu.

...mu...

Beno kwenda na yinzo ya Kisadi ya banzungu. Muntu yankaka ke kwisa samu na kubaka kisika?

Samu Yandi zolaka munu ntete  
Mpe futaka mpulusu ya munu  
Na zulu ya yinti ya Calvaire.

Oh, Yandi kele ve mbote?

<sup>177</sup> Mfumu ya kusakumuka, kento yayi ya ntwenia Nge zaba. Munu ve. Kasi ya kele na kima mosi ya ngitukulu yina me bula yandi kaka mwa ntangu fyoti me luta, ti na kati ya nkonga ya bantu yina yandi kwisaka, kukondwa kundimisa. Yina vwandaka Nge, Mfumu. Yandi me fukama awa na autel,

na yina bankundi ya luzolo pene-pene, na maboko ya bawu na zulu ya yandi. Na kulombaka kyadi, mpe samu na kutwadisa, mpe samu na ngolo ya kimpeve, na yandi. Ti ya salama, Mfumu. Ya kele ya kusonika, ntangu yayi bika yawu salama, ti, “Nge ke simba ve kima ya mbote na bayina ke tambula mbote ve na ntwala ya Nge. Bansilulu ya beno kele yinga mpe amen, na bayina nionso ke zola Nge mpe ke landa Nge.”

<sup>178</sup> Ti ntwenya ya kento kuzaba yayi, mbala mosi, na nkokila yayi, ti ya kele ve na kima na Mazulu, yina ba silaka na Ndinga ya Nzambi, kasi yina Nzambi kele ya kulutila na luzolo samu na kumwangisa yawu mbala mosi na kati ya ntima ya yandi na ntangu yayi. Bika ti ya vwanda na ndambu ya kufwana yina ba pesaka yandi, na yina yandi fukamaka na autel. Bika ti Mpeve-Santu pesa na yandi bima yina yandi zola na kati ya ntima ya yandi. Pesa yawu, Mfumu, samu beto me lomba yayi na Nkumbu ya Yesu.

. . . Yandi zolaka munu ntete  
Mpe futaka mpulusu ya munu  
Na zulu ya . . .

(. . . ? . . .)

<sup>179</sup> Nzambi ya luzolo, bika ti nsatu ya kento yayi kupesama na yandi, samu na baya yandi ya luzolo yina yandi zolaka mingi. Bika ti Mpeve-Santu ya nene kusala kisalu, yina kaka Yandi lenda sala na ntangu yayi. Beto ke pesa yawu nyonso na Nge; ke sambila ti . . . Mitindu ya nge ya luzolo kele mbote mingi kulutila luzingu. David tubaka mutindu yina. “Samu ti bumbote ya Nge kele mbote mingi samu na munu kulutila luzingu, bikoba ya munu ke kumisa Nge.” Pesa yandi nsatu ya ntima ya yandi, Mfumu.

<sup>180</sup> Mutindu dibuundu yayi, mpe munu, longi ya Nge, ke . . . mpe balongi yankaka yina kele na kati ya kivinga, na mutindu ya kulunga kulomba lombilu ya yandi. Na Nkumbu ya Yesu Klisto. Amen.

Beto ke tubaka yawu, mpangi-kento. Sakumuna nge.

<sup>181</sup> Ntangu yayi na yina bantu yayi ke kukipesa bawu mosi, ke kukisikimisa bawu mosi, bawu mosi, na Mfumu, na yina Mpeve ya Yandi ke kota na kati ya kivinga, mu ke zola ti beto telama kaka mwa ntangu fyoti. Pasteur ke kipe bawu na autel. Beto sambila, kaka mwa ntangu fyoti ntangu yayi. Yandi ke kwisa. Mpe beto yimbila ntangu yayi. Yandi ke tuba na mosi na mosi.

<sup>182</sup> Beto kulumusa bayintu ya beto, na yina beto sambila.

Mpe futaka mpulusu ya munu  
Na zulu ya yinti ya Calvaire.  
Mu zola Yandi, mu zola Yandi  
Samu Yandi zolaka munu ntete  
Mpe futaka mpulusu ya munu

Na zulu ya yinti ya Calvaire.  
 mu lenda, mu ke, mu ke kwikila,  
 Mu lenda, mu ke, mu ke kwikila;  
 mu lenda, mu ke, mu ke kwikila  
 Ti Yesu ke vulusa munu ntangu yayi.  
 mu lenda, mu ke, mu ke kwikila,  
 Mu lenda, mu ke, mu ke kwikila;  
 mu lenda, mu ke, mu ke kwikila  
 Ti Yesu ke vulusa munu ntangu yayi.  
 Mu ke baka Yandi na Ndinga ya Yandi,  
 Mu ke baka Yandi na Ndinga ya Yandi.  
 Yangi ke pesaka munu mpulusu ya mpamba  
 Mpe mu ke nata Yandi na Ndinga ya Yandi.  
 mu lenda, mu ke, mu ke sala . . .

<sup>183</sup> Beno tala awa, ntwenya ya bakala. Beno zola kutambula ya nene na Nzambi? Nge ke kwikila ti Yandi ke pesa yawu na nge? [Mpangi-bakala me tuba, “Yinga.”—Mu.] Kana beno ke kwikila na ntima ya beno ya movimba, beno lenda kuzwa yawu. Beno me mona? Nge ke kwikila yawu? [“Yinga, tata. Mu ke kwikila yawu.”] Ndimba yawu? [“Yinga, tata.”]

. . .kwikila ti Yesu ke vulusa munu ntangu yayi.

<sup>184</sup> Bayina nionso ke zolaka Yandi, beno telemisa diboko ya beno. Beno tuba, “Mu ke zolaka Yandi, na nionso—nionso yina kele na kati ya munu.” Yandi kele ve mbote? Na yina beto ke kulumusa bayintu ya beto, kaka na kisambu ya nsuka . . .Beno bambuka moyo na lukutakanu mbasi na nkokila. Mu ke yufula beno, ya kele . . .

<sup>185</sup> Kana beno zola ntangu yayi, na nswalu nionso, mosi na mosi ya beno yina me telemisa diboko ya beno samu na mpulusu, ke belama, ke kwikila ti beno me kuzwa yawu. Kana beno lenda ve kuwa yawu, beno baka mwana ya lukumu. Beno me mona? Beno landila na kutuba ti beno ke kuzwa yawu tii ya ke kuma kieleka.

<sup>186</sup> Beno yina ndimaka kubeluka ya nzutu, mpe beno ke tala ata luswaswanu ve; beno ke tuba, “Lukwikilu ya munu—ya munu kele mingi ve samu na kukatula yawu malu-malu yayi, Mpangi Branham.”

<sup>187</sup> Baka nzila ya mwana ya lukumu. Landila kaka na kutuba, “Mfumumu, mu me beluka. Mu ke kwikila yawu.” Ya ke kwiza. Ya ke nata beno na kati ya nkadulu ya mbote, beno me mona, mpe na yina lukwikilu ya beno ke vwanda ya kusungama. Ya ke baka yawu. Nge ke kwikila yawu kaka na ntima ya nge ya movimba.

<sup>188</sup> Ntangu yayi, mbasi na nkokila, balukutakanu ke banda na ngunga ya sambwadi na ndambu, ntangu ya mumesanu, mbasi na nkokila, mpe konso nkokila sabala yayi. Beno basika mpe beno kuwa Mpangi Neville mpe milongi yankaka yayi, mpe



beto nionso, kintwadi, yina ke meka na kulonga reveil. Nzambi sakumuna beno. Beto lenda nata yawu ve. Beno fwana—beno fwana nata yawu na beto, na nzila ya kusambila, na kukwiza, kusala mvwandulu ya beno awa. Nzambi kuvwanda na beno.

<sup>189</sup> Ntangu yayi, mu ke zola ti beno sala yawu, kaka na ntangu ba ke manisa yawu, na nswalu nionso, samu na ku . . . kudasika na kivinga. Beto kele na ndambu ya ngunga ya repetition awa samu na kusalama. Mpe bayankaka ya bantu ke na kusalaka. Mpe beto ke kulumusa bayintu ya beto.

<sup>190</sup> Mpe mu ke kwikila ti mu kuwaka Mpangi Junie Jackson kuna na kati ya kivinga. Mpangi Junior, nge kele awa na nkokila yayi? Mpangi-bakala ya New Albany, dibuundu ya ba-Methodiste. Mbote mingi. Mpangi Jackson nge ke bika beto na mpova ya kisambu?

[Mpangi Jackson me banda na kusambila. Kisika ya mpamba na bande—Mu.] . . . ? . . . kuvwanda na makwela, kwiza kaka na nswalu ntangu yayi.

<sup>191</sup> Mfumu sakumuna nge. Beto ke mona nge mbasi na nkokila.

Mwana ya mawa mpe ya kiadi;  
Ya ke pesa nge kiese mpe kikesa.

(...?...)



59-0525 Bifwani Ya Klisto  
Branham Tabernacle  
Jeffersonville, Indiana U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)